

MAKI

Yesu'a ma mopafi mai'niya afina'mo Maki'a neya vekamo mai'niye. Agaemo Yulusalemu taonifi'mo mai'nenno ko si'niye. Agaemo ani kava'mo huno Polo'e Pita'e'mo ali'ya veka'anigana huno mai'nenno Goti ali'ya'mo hana maeno ali'niye. Maki'a mani gemo avo'mo kae'niya gemo Yesu'a lokiya ali'ya'mo ali'niya kava'e no'agaya lokiya aune kava'mo hu'niya kava'e'mo avo'mo kae'niye. Yesu'a lokiya ali'ya'mo Goti ali'ya'amo alige hosu apaune vaya'aina alino hapa faino apatalege vaya'ai hosu kava'apimo alino atalege hu'niya kavateti'mo himamu'amo alino apave li'niye. Maki'a ani lokiya kava'mo hu'niya kavafe'mo ava gemo huno avo'mo kae'niye.

**Yoni'a ani'mo faleno ne'apateya vekamo'a aeno hakalo huno hapa
pai'niya gemae.**

(Mt 3:1-12; Lu 3:1-9; 3:15-17; Yo 1:19-28)

1 ¹Alagepa faigoko ge'amo Yesu Kalaisi Goti mafa'ne'amo ava gemo ina kava'mo huno aepa fai'niye. ²Gotitegati gemo alini e'ana ae'ana hakalo hu'ana hapa nepai'a vekala'moganimo ani hogoteno aepa fai'niya kavafe'mo ava gemo hu'ana avo'mo kae male'na'ae. Mago vekamo'a huno'ae'mo, Goti'a huno'ae'mo, ago, huno, apa veka'nimo esiya ka'mo valino atesiya vekamo ali'na atesugeno uno hogotegaiye, huno hu'niye, huno avo'mo kae male'nigeno mago alu vekamo'a huno'ae'mo, ³Mago vekamo'a ka'me kotega mai'nenno alopa gefati'mo ge huno'ae'mo, Ala kava ne'mo ka'mo valitapa ateyo. Esiya ka'mo api ka'mo valitapa ateyo, huno hu'niye, huno avo'mo kae male'niye. ⁴Inagi Yoni'a ka'me kotegamo eno afole aitenno ani'mo faleno apate'niye. Yoni'a, lapaipamo alitapa afe letetapa ani'mo falegeno'ao Goti'a hosu kavatapimo alino ataleno, huno aeno hakalo huno hapa paige hapa paige huno mai'niye. ⁵Asole vaya'mo agaetegamo Yutiya kotegati'mo uge Yulusalemu taonifati'mo uge hu'a u'a afi'nae. Apakaemo hosu kava'apie'mo ae'a hakalo hu'nageno'ae'mo Yoneni anipi'mo ani'mo faleno apate'niye. ⁶Yoni kukena'amo kamo afumo ayokateti'mo alo hu malefa kukenamo alino vaiteno afafale'mo

kamo afumo agufaleti'mo alo hu malefa mapalu'mo alino aeteno akenu'e afela lumemo anu'e'mo neno mai'niye. ⁷Agaemo ina gemo huno hapa pai'niye. Nagae nakame huno ne'eya vekamo'a aeno naga se'niye. Alagi ago aeno naga se'niya'mofe'mo afa'a ape hu'na mai'ne'na su'amo nofi'amo afa'a hakalu osegauve. ⁸Nagaemo ani'aletike'mo fale'na nelapatova'monanafa Goti aote Auneme'aleti'mo faleno lapategaiye.

Yoni'a Yesu'mo ani'mo faleno atetegenoa'ae'mo Satani'a amalageka hu'niya gemae.

(Mt 3:13-17; Lu 3:21-22)

⁹Ani afina'mo Yesu'a Galeliya kotega Nasalasa taonifati'mo ataleno e'nigeno Yoni'a Yoneni anipi'mo ani'mo faleno ate'niye. ¹⁰Yesu'a anipati'mo haineno ageyana koku'na'mo halo ai'nigeno Goti Auneme'amo kaugoyave namagana huno agaetegamo emine'nigeno age'niye. ¹¹Mago vekamo'a koku'napati'mo ge huno'ae'mo, lusi kava huno ne'nahaiya mafa'ne'nimo mai'nane. Amuse hu'na nekatove, huno ha pai'niye. ¹²Huno ha pai'nigeno'ae'mo malage huno Goti Auneme'amo'a alino ategenoa'ae'mo kotegamo u'niye. ¹³Uno foti'a afina'mo mai'nigeno'ae'mo Satani'a amalageka hu'niye. Ani kotega afela afu'e yagagafa'e'mo mai'naya kotegamo uno mai'nige'apae'mo enisole vaya'mogimo emi e'a yagai'a ate'nae.

Yesu'a lole'e lole'e vaya'mo noyame ne'aliya vaya'aife'mo etapa nakame hiyo, huno ge hu'niya gemae.

(Mt 4:12-17; Lu 4:14-15)

¹⁴Apakaemo ani afina'mo Yoni'a ago kalavusi hu'a ate'nageno mai'nigeno'ae'mo Yesu'a Galeliya kotegamo uno Goti'a yagaino apatesiya kavafe'mo alagepa faigoko gemo aeno hakalo huno hapa pai'niye. ¹⁵Hapa paino'ae'mo, alagepa afina'mo ago afole ai'niye. Goti'a vaya'aite'mo yagaino apatesiya afina'mo alagi hogo hu'niyanagi lapaipamo alitapa afe letetapa alagepa faigoko ge'ae'mo lapakesa afitapa fatago hiyo, huno hapa pai'niye. ¹⁶Inagi Yesu'a Galeliya kotegamo alopa ani kotu agi'nale'mo umenitata nehuno'ae'mo ageyana Saimoni'e agana'amo'mo E'nalule'mo noyame ne'ali'a vekala'mo umeni'animo anipi'mo yaga au'ana ne'mala'ageno anake'niye. ^{17,18}Anaketeno'ae'mo noyamemo alitana apavayu hulitana ne'a'a kava hutana vaya'mo nagaetegamo apavalelitana esa'afe'mo ali'na lanaya malegauvanagi etana nakame hi'ao, huno hana pai'nige'ana umeni'animo atale'e'ana akame hu'na'ae. ¹⁹Agaemo aise'amo uno ageyana lole konagala'mo Yemisi'e Yoni'e'mo Sepeti mafa'nela'mo sipifi'mo mai'ne'ana umeni'animo nefakani'ageno anake'niye. ²⁰Anaketeno'ae'mo ge hu'nige'ana sipifi'mo afo'animo'e ali'ya'ale'mo mai'naya vaya'e'mo apatale'e'ana akame hu'na'ae.

Yesu'a mago vekamo aipafati'mo hosu aune vekamo alino hafaino atale'niya gemae.

(Lu 4:31-37)

²¹ Yesu'e ge'amo ne'afiya vaya'e'mo Kapeneyamu taonifi'mo u'a mai'nageno Sapati afina'mo afole ai'nigeno Yesu'a Yu vaya'ai mono nopi'mo haino alino apaya male'niye. ²² Ke'aepa gemo avo'mo kae'a ali'a apaya ne'malaya vayakana huno alino apaya o'male'niya'monanafa himamu'aleti'mo alino apaya male'nige'a afite'apae'mo hapau ai'nae. ²³ Ani afina'mo mago vekamo aipafi'mo hosu aune vekamo mai'niya vekamo mono nopi'mo mai'nenoe'ae'mo, ²⁴ Nasalasa taonifi vekamo Yesuo, huno, lagaetegamo na kava hisanafe'mo e'nane. Alike lago'ya faika latalesanafe'mo e'napiye. Afa'a lato. Kage'novana Goti aote vekamo mai'nane, huno alopa gefati'mo hu'niye. ²⁵ Yesu'a, Ge osu'neka aipafati'mo emikeno, huno lokiya ge huno ha pai'nigeno'ae'mo ²⁶ hosu aune vekamo'a agufale'mo alino uti uti aino ateteno alopa gefati'mo kagegage huteno aipafati'mo emine'niye. ²⁷ Vaya'mogi agete'apae'mo hapau aite'a, na agufa kava'mo nehiye. Haiya agufa saufa geleti'mo alino apaya ne'male. Agaemo himamu'aleti'mo ge nehige'apae'mo hosu apaune vaya'mogi ge'amo afi'nae, hu'a hute'a hapau ai'nae. ²⁸ Ani kava'mo hu'nigeno malage huno Yesufe ava gemo'a aino atagu faeno muki Galeliya kotegamo uneno hu'niye.

Yesu'a muki vaya'mo alino alagepa huno apate'niya gemae.

(Mt 8:14-15; Lu 4:38-39)

²⁹ Yesu'e ge'amo ne'afiya vaya'e'mo mono nopati'mo emi e'apae'mo Yemisi'agi Yoni'agi hu'a Saimonigani E'nalugani nopi'mo hai'a mai'nae. ³⁰ Saimoni ayemo'amo'mo amuko kaita'mo hau'nigeno havaeno mai'niye. Yesu'a haino mai'nige'apae'mo, kaita hau'nigeno havaeno mai'niye, hu'a ha pai'nageno ³¹ uno ayate'mo alino he tino ate'nigeno amuko kaita hau'niya ya'amo hagegeno uno ne'ya'mo alo huno apate'niye. ³² Yegemo lamino fale'nige'apae'mo mago vaya'mogi Yesutegamo kaita hapau'niya vayanagi hosu apaune vaya'mo apaipafi'mo ne'maiya vayanagi hu'a apavaleli'a e'nae. ³³ Muki ani taonifi'mo mai'naya vaya'mo e'a kipate'mo ali'a anupa hu'a mai'nae. ³⁴ Inagi Yesu'a muki alu kaita alu kaita'mo hapau'niya vaya'mo alino hapageno apatege hosu apaune vaya'mo vaya'ai apaipafati'mo alino hapa faino apatalege huno mai'niye. Hosu apaune vaya'mogimo ago age'naya'mofe'mo, ge osiyo, huno hapa pai'niye.

Yesu'a Galeliya kotegamo umenitata huno Goti gemo aeno hakalo huno hapa pai'niya gemae.

(Lu 4:42-44)

³⁵ Egamo kotigefe'mo hu'nigeno'ae'mo Yesu'a he tino taonifati'mo atalenuno vaya'mo o'mai'naya aupilagamo nunumu huno mai'niye.

^{36,37}Nunumu huno mai'nige'apae'mo Saimoni'e avagi hu'a u'naya vaya'e'mo kahauya huli'u'a agete'apae'mo, muki vaya'mogimo kagaemo kagesayafe'mo kahauya huli'a ne'ae, hu'a ha pai'nae. ³⁸Ha pai'nageno'ae'mo, ataleta alu taonifilagamo vigetao. Muki taoni'afi taoni'afi'mo umenitata hu'na ae'na hakalo hu'na hapa paisuvafeke'mo emi'ne'nove, huno hapa pai'niye. ³⁹Hapa paiteno muki Galeliya kotegamo umenitata huno muki asole mono no'afi no'afi'mo aeno hakalo huno hapa paige hosu apaune vaya'aina alino hapafaino apatalege hu'niye.

**Yesu'a lepalosi ya'mo hau'niya vekamo alino alagepa
huno ate'niya gemae.
(Mt 8:1-4; Lu 5:12-16)**

⁴⁰Mago lepalosi ya'mo hau'niya vekamo Yesutegamo eno mopafi'mo ale'ya faino mai'nenoe'ae'mo, kahao ke hove, huno, kahau'nisiyana afa'a alika alagepa huka nategane, huno ha pai'nigeno'ae'mo ⁴¹Yesu'a hau huno ateteno'ae'mo aya'mo alino ataleno agufale'mo male'nenoe'ae'mo, nahau'niyanagi afa'a alagepa huka maiyo, huno ha pai'niye. ⁴²Ha pai'nigeno lepalosi ya'mo alagi hano hu'nigeno afa agufamo hamale'niye. ^{43,44}Yesu'a lokiya ge huno ha painoe'ae'mo, afixo, huno, mago nefe'mo uka ha opaika mono huno ne'apateya vekalegagemo ugeno'ao kagufamo ageno. Kagufamo afa'a hane'ninage'a agesayafe'mo Mosese'a ladinago vaya'aife'mo, ofalinimo alinitutapa amiyo, huno hu'niya ofalinimo alinikuka amiyo, huno ha paiteno alino ate'nigeno u'niye. ⁴⁵Ani gemo huno ha pai'niya'monanafa ne'uno'ae'mo muki vaya'aife'mo hapa paimale hapa paimale hulino u'niye. Ani kava'mo hu'niya'mofe'mo Yesu'a muki vaya'ai apaulagale'mo taonifi'mo afa'a o'u'niye. Vaya'mo o'mai'naya kotegamo uno mai'nige'apae'mo agaetegamo muki haopalegati'mo ete ete hu'nae.

**Yesu'a kanage kanaga osuno ne'maiya vekamo alino alagepa huno
ate'niya gemae.
(Mt 9:1-8; Lu 5:17-26)**

2 ¹Ketogufa afina'mo ago utegenoe Yesu'a halate atagi neno eno Kapeneyamu taonifi'mo ko'ale'mo mai'nige'a agete'apae'mo, no'afi'mo ago eno mai'niye, hu'a hapa pai'nage'a afite'apae'mo ²asole vaya'mo malage hu'a e'a mai'naya nopi'mo hail'a ali'a anupa hu'a mai'a kili paete'a kipatega'e'mo maili'a emi e'nageno maisaya ya'mo alagi ohane'niye. Yesu'a Goti ge'amo aeno hakalo huno hapa nepaige'apae'mo ³lole'e lole'e vaya'mogimo kanage kanaga osuno ne'maiya vekamo hi'yopa male'a alini'a Yesutegamo e'nae. ⁴Nopi'mo ago kili pae'naya'mofe'mo Yesu'a mai'niya haopale'mo avaleli'a ohai'nafa apakaemo nokato'mule'mo hi'yopa alini'a hai'ne'a Yesu'a mai'niya

yateti'mo nokato'mumo ali'a akai male'ne'a hi'yopa kayote'mo nofi aete'a aline'a atalageno lami'niye. ⁵Yesu'a apakeyana agaefe'mo apakesa afi'a fatago hu'nageno apaketeno'ae'mo kanage kanaga osuno ne'maiya vekae'mo ha paino'ae'mo, Mafa'ne'nimogae, huno, hosu kavakamo ago ali'na atale'nove, huno ha pai'niye. ⁶Mago vaya'mo ke'aepa gemo ali'a apaya ne'malaya vaya'mo nopi'mo fai mai'ne'apae'mo, na kava higeno ani agufa gemo hu'niye. Gotife'mo huno faipa huno ate'niye. ⁷Gotike'mo vaya'ai hosu kava'apimo afa'a alino atalegaiye, hu'a apaipafi'mo apakesamo afi'nae. ⁸Yesu'a apaipafi'mo apaketeno'ae'mo, na kava higetapa hosu lapaipa lapakesamo ne'afiye. ⁹Nagaemo hosu kavakamo ali'na atale'nove, hu'na hu'novanage'na he tika hi'yopa kayokamo aliteka uvo hu'na hisuvana haiya agufa kava'mo'a lokiya kava'mo ohane'niye. ¹⁰Lapakaemo Vemo mafa'nemo'a ma mopafi'mo mai'nen'ae'mo vaya'ai hosu kava'apimo alino atalesigetapa agesayafe'mo himamu'amo ali'na lapave liguve, huno huteno kanage kanaga osuno ne'maiya vekae'mo ha paino'ae'mo, ¹¹he tika hi'yopa kayokamo aliteka nokalegamo uvo, hu'na kaha nepauve, huno ha pai'nigeno ¹²apaulagale'mo malage huno he tino hi'yopa kayo'amo aliteno u'niye. U'nige'a agete'apae'mo hapau aite'a Goti agi'ale'mo ali'a asaga hu'a atete'apae'mo, lagaemo hogoteta ani agufa kava'mo alagi o'age'none, hu'a hu'nae.

Yesu'a Livai'fe'mo ge hu'niya gemae

(Mt 9:9-13; Lu 5:27-32)

¹³Yesu'a halate aino atagi neno Galeliya kotega ani kotutegamo u'niye. Uno mai'nige'apae'mo asole vaya'mo e'a ali'a anupa hu'a mai'nageno alino apaya male'niye. ¹⁴Apatalenuno ageyana mago takesi moni ne'aliya vekamo Livai'a Afiyasi mafa'nemo takesi moni ne'aliya nopi'mo fai mai'nigeno age'niye. Ageteno'ae'mo, eka nakame huvo, huno hu'nigeno Livai'a he tinuno akame hu'niye. ¹⁵Henaga'amo Yesu'a uno Livai nopi'mo ne'ya'mo neno mai'niye. Asole vaya'mo takesi moni ne'aliya vayanagi ke'aepa gemo akame nosaya vayanagi hu'a e'a agae'e ge'amo ne'afiya vaya'e'mo magokepi lokae'a mai'ne'a ne'ya'mo ne'nae. Ani afina'mo asole ani agufa vaya'mo e'a aepa fai'a akame hu'nae. ¹⁶Falasi mono vaya'e ke'aepa gemo avo'mo kae'a ali'a apaya ne'malaya vaya'mogi'e'mo apakayana Yesu'e'mo takesi moni ne'aliya vayanagi ke'aepa gemo akame nosaya vayanagi hu'a magokepi lokae'a mai'ne'a ne'ya'mo ne'nage'a apakete'apae'mo ge'amo ne'afiya vaya'aife'mo hapa pai'apae'mo, na kava higeno ani agufa vaya'e'mo magokepi lokaeno mai'nen'ae'mo ne'ya'mo ne'ne, hu'a apafi ge'nae. ¹⁷Yesu'a ani gemo afiteno'ae'mo ge'apile'mo aeno atagaina huno hapa paino'ae'mo, Lota vaya'mogimo kaita ohapau'niya vaya'aite'mo u'a ali'ya'mo no'alifa kaita hapau'niya vaya'aiteke'mo u'a ali'ya'mo ne'aliye. Nagaemo alagepa vaya'aife'mo eyo, hu'na ge

hisuvafe'mo emi'no'me'nofa hosu vaya'aifeke'mo eyo, hu'na ge hisuge'a e'a apaipamo ali'a afe lesayafe'mo emine'nove, huno hapa pai'niye.

Ne'ya'mo o'ne'a mo nesiya kavafe'mo hu'niya gemae.

(Mt 9:14-17; Lu 5:33-39)

¹⁸Mago afina'mo Yoni ge'amo ne'afiya vaya'e Falasi mono vaya'mogi'e'mo mono kava'mo akame hu'a ne'ya'mo o'ne'a mo si'nae. Mago vaya'mo Yesutega e'apae'mo, na kava hige'a Yoni ge'amo ne'afiya vaya'e Falasi mono vaya'mogi'e'mo mono kava'mo akame hu'a ne'ya'mo o'ne'a mo si'a mai'naya'monanafa gekamo ne'afiya vaya'mogimo ne'ya'mo mo nosiye, hu'a afi ge'nae. ¹⁹Yesu'a, a'nemo ne'aliya afina'mo ne'ya'mo o'ne'a mo nesifiye. Ha'ao a aligefe hu'niya vekamo apakae'e'mo magokepi lokaeno mai'nige'apae'mo apamogaga ai'a ne'ya'mo ne'nae. ²⁰Henaga'amo mago vaya'mogi a'mo aligefe hu'niya vekamo avaleli'a visage'apae'mo ne'ya'mo o'ne'a mo sigae. ²¹Atafa lavolavomo halo ne'aige'apae'mo saufa lavolavomo sese osu'naya lavolavoleti'mo lagau'a nofakaniye. Saufa lavolavoleti'mo lagau'a fakanisayana sese nehisageno'ae'mo atupa'amo aino vayu hisigeno atalagauno alino avala aisigeno mago'e huno alopa ka'mo halo aigiye. ²²Ani kava hu'a vaya'mogimo saufa nofi alagafati ani'mo ali'a atafa afu agufa kepi'mo he nofiye. Hefisayana ani'mo'a atafa ke'mo ago aeno apalo atino ani'mo asagauno aisigeno ke'a'e'mo alagi hosugiye. Saufa ani'mo saufa afu agufa kepi'mo hefisageno'ae'mo afa'a hanegaie, huno hapa pai'niye.

Sapati afinafe'mo hu'niya gemae.

(Mt 12:1-8; Lu 6:1-5)

²³Mago Sapati afina'mo Yesu'e ge'amo ne'afiya vaya'e'mo viti hoyamo laisigana ya'mo hane'niya hoya folagapi'mo u'nae. Yesu ge'amo ne'afiya vaya'mogimo viti alagamo lagi'a neme neme u'nae. ²⁴Falasi mono vaya'mogi Yesufe'mo, Apako, hu'a, gekamo ne'afiya vaya'mogimo Sapati afina'mo ke'aepa getimo ago amagi'a ne'atalae, hu'a ha pai'nae. ²⁵Yesu'a, Nevini'e avagi hu'a u'naya vaya'mogi'e'mo apaka te'nige'apae'mo hu'naya kavafe'mo ava gemo lekana paitapa o'afi'nafiye. ²⁶Amai'yata'a mono huno ne'apateya vekamo mai'nigeno'ae'mo Nevini'a mono nopi'mo haino Goti'mo ofalinimo ami'naya peleti mayamo alino neteno avagi hu'a u'naya vaya'aina alino apami'niye. Muki vaya'mogimo no'naya ne'ya'mo hane'niya'monanafa mono hu'a ne'apataya vaya'amogige'mo nesaya ne'ya'mo hane'niyana ani ne'ya'mo ne'nayana hosu kava'mo osu'nae. ²⁷Goti'a muki vaya'mogi Sapati afina'mo ha maesayafe'mo hu o'male'nifa Sapati afina'mo'a muki vaya'mo hapa maesiyafe'mo hu male'niye. ²⁸Ani kava'mo hu'niya'mofe'mo Vemo mafa'nemo'a Sapati afinat'e'mo ne'yagaiye, huno hapa pai'niye.

Aya'mo kalage ki'niya vekamo ava gemae.

(Mt 12:9-14; Lu 6:6-11)

3 ¹Yesu'a halate Yu vaya'ai mono nopi'mo haino mai'nigeno aya'mo kalage ki'niya vekamo ani mono nopi'mo mai'niye. ²Mago vaya'amogimo agoti hu'a atesayafe'mo age'a mai'ne'apae'mo, Sapati afina'mo alino alagepa huno atesifigeta agegaune, hu'a hu'nae. ³Yesu'a aya'mo kalage ki'niya vekae'mo, he tika male eno, huno ha paiteno'ae'mo ⁴apakaefe'mo, Sapati afina'mo ke'aepa gemo akame hisunafe'mo na agufa kava'mo hugune. Sapati afina'mo alagepa kava'mo hisupi hosu kava'mo hugune. Vaya'mo hapaesupi hapa maegaune, huno apafi ge'nige'apae'mo ge osu'a afa'a mai'nae. ⁵Yesu'a aulu hapaeno apakelinuneno huteno aipamo leno apate'niye. Lokiya apaipa vaya'mo mai'naya'mofe'mo aipamo'mo kana hu'niye. Agaemo, kaya'mo aeka hayo huvo, huno hu'nigeno aya'mo aeno hayo nehigeno'ae'mo aeno api ai'nigeno afa'a hane'niya ayakana huno hane'niye. ⁶Falasi mono vaya'mogi ani kava'mo agete'apae'mo mono nopati'mo emi e'a malage hu'a Heloti'a akame hu'naya vaya'e'mo ali'a anupa hu'a mai'ne'a Yesu'a haesayafe'mo ge huge afige hu'a mai'nae.

Muki vaya'mo ani kotute'mo ali'a anupa hu'a mai'naya gemae.

(Lu 6:17-19)

^{7,8}Yesu'e ge'amo ne'afiya vaya'e'mo apatale'a Galeliya kotega ani kotutegamo ne'vage'apae'mo Galeliya kotegati'mo asole vaya'mo apakame hu'a u'nae. Asole vaya'mogimo hu'niya kavafe'mo ava gemo afite'apae'mo Yutiya kotegati ege Yulusalemu taonifati'mo ege Itomiya haopaleti'mo ege Yoneni ani faliga kotegati'mo ege Taiya taoni haopalegati'mo ege Saitoni taoni haopalegati'mo ege hu'a Yesutegamo e'nae. ^{9,10}Hogoteno asole vaya'mo ago alino alagepa huno apate'niya'mofe'mo kaita hapau'niya vaya'mo e'a agufale'mo ame alisayafe'mo e'a fai'a kili paete'a male'a apali'nae. Male'a apali'naya'mofe'mo ge'amo ne'afiya vaya'aife'mo, male'a o'napalisayafe'mo mago aise sipimo alitapa alo hutapa nateyo, huno hapa pai'niye. ¹¹Hosu apaune vaya'mogimo agete'apae'mo asagau'a aite'a alopa gefati'mo ge hu'apae'mo, Goti mafa'ne'amo mai'nane, hu'a ha pai'nae. ¹²Yesu'a hosu apaune vaya'aife'mo lokiya gemo huno hapa pai'niye. Ina la'namo mai'nofi hutapa hapa opaiyo.

Yesu'a apa vaya'amo lekana paino apate'niya gemae.

(Mt 10:1-4; Lu 6:12-16)

¹³Yesu'a aise avele'mo haino mai'nen'ae'mo hau'niya vaya'aife'mo ge hu'nige'a agaetegamo e'nae. ^{14,15}Agaemo tuolofu'a vaya'mo agae'e'mo magokepi lokae'a maige alino apatesige'a u'a Goti ge'amo ae'a hakalo

hu'a hapa paige kaita hapau'nisiya vaya'aina ali'a hapage'a apatege himamu'aleti'mo hosu apaune vaya'aina ali'a hapa fai'a apatalege hisayafe'mo lekana paino apate'niye. ¹⁶Lekana paino apate'niya vaya'ai apaki'apimo hane'niye. Yesu'a Saimonife'mo Pita'ae huno agi ate'niya vekagi ¹⁷Sepeti mafa'nela'mo Yemisi'e agana'amo'mo Yoni'efe'mo Yesu'a Mo'anasisi vekalane huno anaki anate'niya anakimo aepa'amo hakalu nehiya agufa kava'mo huno lokiya vekalanagi ^{18,19}E'nalu'agi Filipi'agi Matolomiyu'agi Matiyu'agi Tomasi'agi Afiyasi mafa'nemo Yemisi'agi Ta'niyasi'agi Saimoni Seloti'agi Yutasi Isakaliyoti'a Yesu kutulu ya'mo ali'niya vekagi hu'a mai'nae.

Satani'mo Yesu aipafi'mo mai'niye hu'a hu'naya gemae.

(Mt 12:24-32; Lu 11:14-23; 12:10)

²⁰Yesu'a halate no'alega uno mai'nige'apae'mo asole vaya'mo e'a ali'a anupa hu'a mai'nageno'ae'mo Yesu'e ge'amo ne'afiya vaya'e'mo ne'ya'mo nesaya kana'apimo ohane'niye. ²¹Yesu vaya'amogimo ani kavafe'mo ava gemo afite'apae'mo, negi kava'mo nehiye, hu'a hute'a avalesayafe'mo u'nae. ²²Ke'aepa gemo ali'a apaya ne'malaya vaya'mo Yulusalemu taonifati'mo e'apae'mo, Mielisemuli'a aipafi'mo mai'niye. Hosu apaune vaya'aite'mo yagaino ne'apateya vekamo himamu'aleti'mo hosu apaune vaya'mo vaya'ai apaipafati'mo alino hapafaino ne'apatale, hu'a hu'nae. ²³Yesu'a, eyo, huno ge hu'nige'a e'nageno'ae'mo aeno kalafea gemo huno hapa paino'ae'mo, haiya kava huno Satani'a agai'amo afa'a alino ha faino atalegaiye. ²⁴Magoke vayapati'mo ali'a fako hute'a apakai'apimo hapae'a hano hu'a apatalegae. ²⁵Ani kava'mo hu'a magoke afamo anaga'mogimo ali'a fako hu'a kaveta hisayana magokepi alagepa hu'a lokae'a o'maigae. ²⁶Ani kava huno Satani'a yagaino ne'apateya vaya'alegamo kame huno apatesiyana muki vaya'aite'mo yagaino ne'apateya himamu'amo hano hugiye. ²⁷No aepa vekamo lokiya vekamo mai'nisiyana mago vekamo'a eno atafauno nofi kino o'ate'nisiyana no'afati'mo muki kagemi ya'amo afa'a haino o'aligiye. Hogoteno no aepa vekamo atafauno nofi kino ate'nisiya'mo'mo afa'a haino no'afati'mo muki ya'amo aligiye. ²⁸Lama gemo lapa nepauve, huno, Goti'a muki hosu kava'apigi agaefe'mo hu'a faipa hu'a ne'ataya ge'apimogi huno afa'a alino atalegaiye. ²⁹Alino atalegaiya'monanafa aote Auneme'ae'mo hu'a faipa hu'a ne'atesaya vaya'ai hosu kava'apimo alagi alino o'atalesigeno hu'a faipa hu'a ne'ataya gemo anona'apimo afa'a hanege hanege huno hanegaiye, huno hapa pai'niye. ³⁰Apakaemo Yesufe'mo hosu aune vekamo aipafi'mo mai'niye, hu'a hu'naya'mofe'mo ani gemo hapa pai'niye.

Yesu ita'amo'e agana'amogi'efe'mo apava gemae.

(Mt 12:46-50; Lu 8:19-21)

³¹Ani afina'mo Yesu ita'amo'e agana'amogi'e'mo e'a kumategamo he ti'a mai'ne'apae'mo mago vekamo ali'a ate'nageno nopi'mo hai'niye.

³² Asole vaya'mogimo fai'a ku ai'a ate'a mai'ne'apae'mo, itakamo'e kaganakamogi'e'mo kagaemo kagesayafe'mo e'a kumatega mai'nae, hu'a ha pai'nageno'ae'mo, ^{33,34} ita'nimo'e nagana'nimogi'e'mo haiyate e'a mai'nae, huno huteno aulu hapaelinuneno huno ne'apakeno'ae'mo, ita'nimogi'e nagana'nimogi'e'mo manifi'mo mai'nae. ³⁵ Goti'a hau'niya kava'age'mo nehaya vaya'mo nagana'nimogi maige nasa'nimogi maige ita'nimogimo maige hu'a mai'nae, huno hapa pai'niye.

Avina ya'mo hakale'niya vekamo ava gemae.

(Mt 13:1-9; Lu 8:4-8)

4 ¹ Halate Yesu'a Galeliya kotega ani kotu agi'nale'mo aepa faino alino apaya male'niye. Asole vaya'mo agaetegamo e'a ali'a anupa hu'a mai'nageno'ae'mo sipifi'mo haino fai mai'niye. Sipimo anipi'mo hane'nige'a ani agi'nale'mo mai'nae. ² Agaemo mago'e huno aeno kalafefa gemo huno alino apaya maleno'ae'mo, ³ Afiyo, huno, mago vekamo'a avina ya'mo hakalesiyafe'mo hoya'alegamo u'niye. ⁴ Avina ya'mo yaga auno ataleme ataleme u'nigeno'ae'mo mago avina ya'mo kate'mo asagauno ai'nige'a nama anaga'mogi e'a ne'nae. ⁵ Mago avina ya'mo yafa agotofule'mo aise mopamo hane'niya yate'mo asagauno ai'niye. Aise mopamo hane'niya'mofe'mo malage huno hage'nigeno'ae'mo ⁶ yegemo'mo haineno ne'agegeno'ae'mo leno asaga li'niye. Hafu'yamo o'ae'niya'mofe'mo ago falu te'niye. ⁷ Mago avina ya'mo afe nofi'mo hane'niya mopafi'mo asagauno ai'nigeno afe nofi'mo'a hageno hai'neni kino ati kae'nigeno alagamo o'ae'niye. ⁸ Mago avina ya'mo alagepa mopafi'mo asagauno aiteni hageno haineni alagamo ae'niye. Teti'a alagamo aege sigisiti'amo aege vani hataleti'amo aege huno ae'niye. ⁹ Gemo afisaya lapakesamo hane'nisiyana mani gemo afiyo, huno hapa pai'niye.

¹⁰ Yesu'a agai'age'mo mai'nige'apae'mo ge'amo afi'naya vaya'e tuolofu'a vaya'mo ge'amo ne'afiya vaya'mogi'e'mo e'a, mani aeka kalafefa gemo hu'nana gemo aepa'amo laha paiyo, hu'a afe ge'nageno'ae'mo ¹¹ Goti'a yagaino ne'apateya kavafe'mo ava gemo fala ki'niya gemo aepa'amo afisayafe'mo ago alino lapami'niya'monanafa malaga vaya'aife'mo ani agufa ae'na kalafefa ge'age'mo hu'na hapa nepauve.

¹² Agege agege hu'a maigayana age'a aeto osuge afege afege hu'a maigayana afi'a aeto osuge hu'a maisayafe'mo ani agufa ae'na kalafefa gemo hapa nepauve. Afi'a aeto hute'a ai'a atagine'a Gotitegamo esageno hosu kava'apimo afa'a alino o'atalesiyafe'mo ani agufa ae'na kalafefa gemo hapa nepauve, huno hapa pai'niye.

¹³ Hapa paiteno'ae'mo, ani ae'na kalafefa gemo aepa'amo o'afi'nafiye. Ani ae'na kalafefa gemo aepa'amo o'afi'nisayana haiya kava hutapa muki

ae'na kalafefa gemo aepa'amo afigae. ¹⁴Avina ya'mo nehakaleya vekamo'a Goti ge'amo nehakale. ¹⁵Mago avina ya'mo kate'mo asagauno ai'niya avina yakana hu'a vaya'mogi Goti ge'amo ne'afigeno'ae'mo Satani'a eno apaipafi'mo hakale'niya gemo alinino ne'viye. ¹⁶Mago avina ya'mo yafa agotofule'mo asagauno ai'niya avina yakana hu'a vaya'mogi Goti ge'amo afite'apae'mo malage hu'a apamogaga ne'aiye. ¹⁷Apamogaga ne'aiya'monanafa hapafu'ya'apimo o'ae'niya'mofe'mo aise afina'mo mai'nageno'ae'mo apakaetegamo hanageke ya'mo afole aige Goti ge'amo no'afiya vaya'mogi apaini hu'a apatege nehage'apae'mo malage hu'a ago asagau'a ne'aiye. ^{18,19}Mago avina ya'mo afe nafi hane'niya mopafi'mo asagauno ai'niya avina yakana hu'a mago vaya'mogi Goti ge'amo afite'apae'mo ma mopafi kavafe'mo hapausoli huge monimo'a humi apate'nige'a lusi kava huno hapauge mago'e ya'mo alisayafe'mo hapa'ye huge hu'a ne'maigeno'ae'mo ani kava'mo'a Goti ge'amo ago aeno ati nekaegen'o'ae'mo alagamo no'ae. ²⁰Mago avina ya'mo alagepa mopafi'mo asagauno ai'niya avina yakana hu'a mago vaya'mogi Goti ge'amo afite'apae'mo ali'a apaipafi'mo ne'malageno'ae'mo teti'a alagamo aege sigisiti'a alagamo aege vani hataleti'a alagamo aege hu'a ne'maiye, huno hapa pai'niye.

Lamu kanife'mo ava gemo hu'niya gemae.

(Lu 8:16-18)

²¹Hapa paiteno'ae'mo, lamufi'mo kani ae'a kaete'apae'mo paketi afe'alumelaga malege hipagapi'mo malege hu'a ne'malafiye. Ha'ao hi'yalamuteke'mo ne'malae. ²²Muki ya'amo fala kino hane'niyanageno henaga'amo afole aigiye. Muki ya'amo aeno ati kae male'niyanageno henaga'amo ha le yategamo afole aigiye. ²³Gemo ne'afisaya lapakesamo hane'nisiyana mani gemo afiyo. ²⁴Gemo ne'afitapae'mo alagepa hutapa lapakesamo afiyo. Afitetapae'mo lapaipa lapakesamo ne'amisageno'ae'mo Goti'a ani kava huno lapamigiye. Alagepa hutapa ne'afisayana mago'e huno alino lapamigiye. ²⁵Ali'naya vaya'aina mago'e huno alino apamigiye. O'ali'nisaya vaya'ai apayapati'mo aise'amo ali'nisaya ya'mo hapafaleno atalegiye, huno hapa pai'niye.

²⁶Hapa paiteno'ae'mo, Goti'a yagaino ne'apateya kava huno mago vekamo'a avina ya'mo hoyafi'mo nehakale. ²⁷Hani'ilagamo havaege felugamo umenitata huge nehigeno'ae'mo avina ya'mo nehageya'monanafa no'age. ²⁸Mopamoke'mo ani agufa ali'ya'mo ne'aligeno ne'ya'mo afole ne'aiye. Hogoteno yosa'age'mo hageteno'aeke'mo haita'amo maleteno ne'ya'mo afole ne'aiye. ²⁹Ne'ya'mo nelegeno'ae'mo ani vekamo'a naipeleti'mo heno hatagauno ne'aliye, huno hapa pai'niye.

Masateti avina yafe'mo ava gemo hu'niya gemae

(Mt 13:31-32; Lu 13:18-19)

³⁰Hapa paiteno'ae'mo, Goti'a yagaino ne'apateya kava'mo'a na agufa kavakana huno hane'niye. Ani kavafe'mo haiya agufa aune gemo

hisune. ³¹Ina kava'mo huno mago vekamo'a aise avina ya'mo agi'amo masateti avina ya'mo hakale'niye. Muki avina ya'mo alopa avina ya'mo hane'niya'mofe'mo ani aise avina ya'mo ago aeno aga se'niye. ³²Aise avina ya'mo hane'niya'monanafa hakale male'nigeno'ae'mo hagenuno haino alopa heteno'ae'mo muki ne'ya'amo ago aeno aga seno akopamo ae'nige'apae'mo nama anaga'mogimo akopa'amo ulunapi'mo apano'mo nekiye, huno hapa pai'niye. ³³Yesu'a mago'e huno ani agufa aeno kalafefa gefati'mo afa'a afisayafe'mo aeno hakalo huno hapa pai'niye. ³⁴Aeno kalafefa ge'age'mo huno hapa pai'niya'monanafa agai'ageke'mo mai'nen'ae'mo ge'amo ne'afiya vaya'aifeke'mo ani gemo aepa'amo hapa pai'niye.

Yesu'a yasi'e ani'e'mo afa'a hane'ao, huno hu'niya gemae
(Mt 8:23-27; Lu 8:22-25)

³⁵Ani afina'mo une'amo Yesu'a ge'amo ne'afiya vaya'aife'mo, mugagayaga faligamo vigetao, huno hapa pai'niye. ³⁶Hapa pai'nige'a muki vaya'amo apatale'a Yesu'a mai'niya sipifi'mo hai'a maite'a avaleli'a u'nae. Ne'vageno'ae'mo mago alu sipi'e'mo u'nige'a lokaeli'a u'nae. ³⁷Ne'vageno'ae'mo lusi kava huno yasimo aliteno ani'mo aino holakau holakau huno haineno sipifi'mo aeno havaite'nigeno aeno lapanegefe'mo hu'niye. ³⁸Yesu'a sipimo akamelegamo afita aino havaeno mai'niye. Ge'amo ne'afiya vaya'mogi haune'a ate'ne'apae'mo, tisao, hu'a, lagaemo aise afina'mo ani'mo nesuna agufa kava'mo nehunanagi lagaefe'mo kagesamo no'afipiye, hu'a ha pai'nae. ³⁹He tino yasie'mo ge hauteno anife'mo, afa'a maiyo, huno hu'nigeno yasimo hano hu'nigeno ani'mo afa'a hane'niye. ⁴⁰Yesu'a ge'amo ne'afiya vaya'aife'mo, na kava higetapa lusi kava hutapa koli nehae. Na kava higetapae'mo nagaefe'mo lapakesa afitapa fatago nosae, huno hapa pai'nige'apae'mo ⁴¹lusi kava hu'a koli nehu'a apakai'apimo ge huge afige hu'apae'mo, na agufa vekamo mai'niye. Yasimo'e ani'mo'e'mo ge'amo ne'afi'ae, hu'a hu'nae.

Hosu apaune vaya'mo mago vekamo aipafi'mo mai'naya
vekamo ava gemae.
(Mt 8:28-34; Lu 8:26-39)

5 ¹Apakaemo ani kotu'mo lakae'a Gatalini vaya'mo ne'maiya aupilagamo u'a aval'i hu'nae. ²Yesu'a sipifati'mo emine ne'egen'ae'mo hosu apaune vaya'mo aipafi'mo mai'naya vekamo kanolufilagati'mo ne'ege'a fotu hu'nae. ³Ani vekamo vaya'mo ki'a ne'apataya yafaka kanolufilaga ne'maige'apae'mo mago vaya'mogimo u'a ataufe'ge hu'nayana afa'a o'atafuge seli nofiteti'mo ki'a ategefe hu'nayana afa'a ki'a o'atege hu'naya vekae. ⁴Mago vaya'mogimo muki afina'ae afina'ae'mo aiyalate'mo hanikapu ai'a atege ayatalate'mo seli nofiteti'mo ki'a atege hu'naya'monanafa seli nofi'mo alino kapalu aege

hanikapumo aino lo aege huno mai'nige'apae'mo afa'a yagai'a o'ate'nae.
⁵Muki afina'mo feluga'e hani'ilaga'e'mo kanolufilaga'e avelega'e'mo umenitata
 nehuno'ae'mo lusi kava huno kagegage nehuno'ae'mo agai'a agufamo
 yafateti'mo heno hatagauno mai'niye.

^{6,7}Agamo afagitegati'mo Yesu'mo ageteno'ae'mo nagu nagu huno eno
 aiyafi'mo ale'ya fai'nen'o'ae'mo alopa gefati'mo mono huno'ae'mo, Yesuo, huno,
 Hogote vekamo anaga vekamo Goti mafa'ne'amogae, huno, nagaetegamo na
 agufa kava'mo huka nategefe'mo ne'ane. Goti agi'aleti'mo kago'ya ataleteka
 hukae'mo, kagafu kisiya ya'mo ali'na okamiguve, huka naha paiyo, huno ha
 pai'niye. ⁸Hogoteno Yesu'a huno'ae'mo, hosu aune neo, huno, aipafati'mo
 emikeno, huno hu'niya'mofe'mo ani gemo hu'niye. ⁹Yesu'a, kagikamo ina lagae,
 huno afi ge'nigeno'ae'mo lagaemo asole vaya'mo mai'nona'mofe'mo nagi'nimo
 asole vaya'nae, huno ha paiteno'ae'mo, ¹⁰kahao ke hovanagi afagitega alika
 laha faika olatalo, huno huge huge huno mai'niye. ¹¹Inagi asole afu anaga'mo
 avele'mo ne'a mai'nae. ¹²Hosu apaune vaya'mogi, alika laha faitalegeta afu
 anaga'ai apaipafi'mo haita maino, hu'a afi ge'nae. ¹³Yesu'a, kanalenagi afa'a
 viyo, huno hu'nige'a hosu apaune vaya'mo aipafati'mo emi e'a tu tausen'i'a agufa
 afu anaga'ai apaipafi'mo fale'a hai'nage'apae'mo aulafifati'mo nagu nagu hu'a
 u'a lami'a ani kotupi'mo asagau'a aite'a ani'mo nete'a fali'nae.

¹⁴Ani afule'mo ne'yagaiya vaya'mo apaune he'u'a taonifi'mo mai'naya
 vaya'aife'mo hapa paige alu haopalega u'a hapa paige hu'a hapa pai'nage'a
 afite'apae'mo agesayafe'mo e'nae. ¹⁵Apakaemo Yesutegamo e'a agayana hosu
 apaune vaya'mo aipafati'mo alino hapafaitale'niya vekamo'mo kukenamo alino
 vaiteno mopafi'mo fai mai'nigeno agesamo aino halo ai'nigeno mai'nige'a e'a
 agete'apae'mo koli hu'nae. ¹⁶Ani kava'mo age'naya vaya'mogimo hosu apaune
 vaya'mo aipafi'mo mai'naya vekae'mo ava gemo huge afu anaga'aife'mo apava
 gemo huge hu'a hapa pai'nae. ¹⁷Hapa pai'nage'a afite'apae'mo Yesufe'mo,
 kahao ke honanagi mani koteti'mo ataleka uvo, hu'a ha pai'nae. ¹⁸Yesu'a
 sipifi'mo hai'nigeno'ae'mo hosu apaune vaya'mo aipafati'mo alino hapafaino
 apatale'niya vekamo'mo, kahao ke hove, huno, kagae'e'mo ugesugi navalelika
 ugapiye, huno afi ge'nigeno'ae'mo ¹⁹Yesu'a, ha'ao, huno, vayakalegagemo uka
 Ala kava ne'mo'a lusi kava huno hau huno kateteno kaha mae'niya kavafe'mo
 ava gemo huka hapa paiyo, huno ha pai'niye. ²⁰Ha pai'nigeno uno naya lole'a
 taonimo agi'amo Nekapolisi kotegamo umenitata huno Yesu'a lusi kava huno ha
 mae'niya kavafe'mo ava gemo aeno hakalo huno hapa paimale hapa paimale
 hulino u'nige'a ani gemo afite'apae'mo hapau ai'nae.

**Yailasi a'mafa'ne'e mago kaita hau'niya a kano'efe'mo anava gemo
 hu'niya gemae**

(Mt 9:18-26; Lu 8:40-56)

²¹Yesu'a halate mugagayaga faligamo lakaenuno ani agi'nale'mo
 mai'nige'apae'mo asole vaya'mo e'a ali'a anupa hu'a mai'nae.

22,23 Mai'nageno Yailasi'a Yu vaya'ai monote'mo ne'yagaiya vekamo'a eno Yesu'mo ageteno'ae'mo aiyafi'mo ago'ya faino mai'nenom'ae'mo, kahao ke hove, huno, a'mafa'ne'nimo aise afina'mo ago faligefe hu'nige'nae'mo huvanagi halate alagepa huno maisiyafe'mo eka agufale'mo kaya'mo maleka ato, huno lokiya ge huno afi ge'nigenom'ae'mo 24 Yesu'a agae'e'mo u'niye. Ne'vige'apae'mo fai'a ku aili ku aili hu'a male'a apalini'a u'nae.

25 Mago a kanomo tuolofu'a kafugamo aigu'ya'mo hauge hauge huno mai'niya a kanomo mai'niye. 26 Agaemo alu lota vaya alu lota vaya'aitegamo uge uge hu'niyana ha o'mae'nageno lusi agafu ki'nigeno muki moni'amo atale'niyana ha okeno mago'e huno hauge hauge huno mai'niye. 27,28 Agaemo Yesufe'mo ava gemo afitenom'ae'mo asole vaya'e'mo eno magokepi lokaolino ne'eno'ae'mo, kukena'ale'mo ame alisuvana aigu'ya'nimo alagi nahagegaiye, huno agesamo afitenom'ae'mo akamelegati'mo eno kukena'ale'mo ame ali'niye. 29 Ame ne'aligenom'ae'mo aigu'ya'amo malage huno hage'nigenom'ae'mo agufafilagamo alino amalagino age'niye. 30 Ame ne'aligenom'ae'mo Yesu'a ageyana agufafati'mo himamu'amo ago u'nigenom'ae'mo. Agetenom'ae'mo muki vaya'e'mo magokepi ne'eno'ae'mo aino afe leno, ina la'mo kukena'nile'mo ame ali'niye, huno apafi ge'niye. 31 Apafi ge'nige'apae'mo ge'amo ne'afiya vaya'mogi hu'apae'mo, asole vaya'mogimo male'a kapalini'a ne'vagi na kava higekae'mo ina la'mo kukena'nile'mo ame ali'niye, huka nehane, hu'a afi ge'nae.

32 Yesu'a ame ali'niya vekamo agesiyafe'mo aulaga halino apakelinuneno hu'niye. 33 Aulaga halino ne'apakegenom'ae'mo ani a kanomom'ae'mo agufafilagamo afole ai'niya kava'mo agetenom'ae'mo eno aiyafi'mo ago'ya fai'nenom'ae'mo koli huteno atete nehaigenom'ae'mo Yesufe'mo muki kava'ae'mo lama ge huno ava gemo huno ha pai'niye. 34 Ani gemo ha pai'nigenom'ae'mo, a'mafa'neo, huno, kagesa afika fatago hu'nana kavakamom'ae'mo alino alagepa huno kate'niyanagi uka alagepa huka maigenom'ae'mo kaipamom'ae'mo falu hino, huno ha pai'niye. 35 Ha nepaige'apae'mo mago vaya'mo Yailasi'a Yu vaya'ai monote'mo ne'yagaiya vekamo notegati'mo e'apae'mo, a'mafa'nekamom'ae'mo ago fali'nigi na kava higeka tisa vekamo alaga haesiya ya'mo alika ne'amine, hu'a ha pai'nae. 36 Yesu'a ani gemo afitenom'ae'mo monote ne'yagaiya vekae'mo ha painom'ae'mo, koli osuka nagaefeke'mo kagesa afika fatago huvo, huno ha paiteno 37 muki vaya'aife'mo, o'metapa afa'a maiyo, huno hapa paiteno Pita'agi Yemisi'agi Yemisi aganam'ae'mo Yoni'agi huno apavalelino u'niye. 38 Monote ne'yagaiya vekamo notem'ae'mo u'a ava'yi hute'apae'mo Yesu'a apakeyana ani vaya'mogi apamom'ae'mo aete'a faiyosago fai'a avi'ya nehagenom'ae'mo apake'niye. 39 Agaemo nopi'mo nehainom'ae'mo, na kava hige'apae'mo lapamom'ae'mo aetetapa avi'ya nehae. Ani a'mafa'nemom'ae'mo ofali'nifa afa'a au kalenom'ae'mo mai'niye, huno hapa pai'niye. 40 Hapa pai'nige'apae'mo lusi kava hu'a kigi hu'a ate'nagenom'ae'mo muki vaya'amo ago alino hapa faitalege'a

kumataga lami'nae. Agaemo ani a'mafa'nemo ita'afo'ala'moganimogi agaemo avagi hu'a e'naya vayanagi huno apavalelino ani a'mafa'nemo male'naya nopi'mo hai'nae. ⁴¹ Ayate'mo ne'alino'ae'mo, talita kumi, huno hu'niye. Ani gemo aepa'amo hane'niyana aise a'mafa'neo, hu'na, he tiyo, hu'na kaha nepauve, huno hu'niye. ⁴² Huno nehigeno'ae'mo malage huno he tino umenitata hu'niye. Ani a'mafa'nemo tuolofu'a kafugamo mai'niya a'mafa'nemae. Umenitata hu'nige'a agete'apae'mo lusi kava hu'a hapau ai'nae. ⁴³ Yesu'a lokiya gemo huno hapa paiteno'ae'mo, mago vaya'aife'mo utapa hapa opaiyo, huno ha paiteno, mago ne'ya'mo alitapa amiyo, huno hapa pai'niye.

**Nasalasa taonifi'mo mai'naya vaya'mogi Yesufe'mo apakame'yamo
ami'naya gemae**
(Mt 13:53-58; Lu 4:16-30)

6 ¹ Yesu'a ani kotegamo ataleno ko'alegamo u'nige'apae'mo ge'amo ne'afiya vaya'mo akame hu'a u'nae. ² Agaemo Sapati afina'mo Yu vaya'ai mono nopi'mo haino mono gemo aepa faino alino apaya male'niye. Asole vaya'mogi ani gemo afi'a hapau aite'apae'mo, mani vekamo'a ani gemo haiya'aleti'mo ali'niye. Alagepa agesa afi ya'mo haiya agufa agesa afi ya'mo ali'niya'mofe'mo no'agona agufa lokiya aune kava'mo nehiye. ³ Lagaemo age'nonana afa'a no nekiya vekamo mai'niye. Maliya mafa'nemo mai'nigeta ageteta agana'amogimo Yemisi'agi Yosesi'agi Yutasi'agi Saimoni'agi huta apaketeta asa'amogi'e'mo magokepi lokaeta mai'none, hu'a hute'a hosu apaipamo kali'a atete'a apakame'yamo ami'nae.

⁴ Yesu'a, Gotitegati gemo alinineno aeno hakalo huno hapa nepaiya vekamo'a muki haopalegamo agi hane'niya'monanafa afamo anaga'afi'e ko'alega vaya'aitega'e'mo agi ohane'niye, huno hapa pai'niye. ⁵ Agaemo ko'alegamo no'agaya agufa lokiya aune kava'mo afa'a osu'niye. Afa'a osu'niya'monanafa magoke magoke vaya'mo kaita hapau'niya vaya'aite'mo aya'mo male'nenno alino hapageno apate'niye. ⁶ Agaefe'mo apakesa afi'a fatago osu'naya'mofe'mo agesa ala'amo afi'niye. Apatalenuno Goti ge'amo hapa paimale hapa paimale hulino uneno hu'niye.

Yesu'a tuolofu'a vaya'mo alino apatege'a u'naya gemae
(Mt 10:5-15; Lu 9:1-6)

⁷ Yesu'a tuolofu'a vaya'aife'mo, eyo, huno hu'nige'a agaetegamo e'nageno lole vekala'mo alino lokaeno anatete anatete huteno alino apatesige'a u'a hosu apaune vaya'mo ali'a hapafai'a apatalesayafe'mo himamu'amo alino apami'niye. ^{8,9} Apamitenno hapa paino'ae'mo, muki asole yatapimo alinitapa o'viyo. Kunagi peleti mayagi kutapifi monigi

hutapa alinitapa o'viyo. Hayopa kayotapimo alitetapa su'mo vaitetapa magoke siotimo vaitetapa viyo. ¹⁰Utapa taonifi'mo ava'yi hutetapa magoke nopi'mo haitapa mai'netapa henaga'amo ataletapa viyo.

¹¹Ne'visage'apae'mo mago taonifi'mo mai'nisaya vaya'mogimo ali'a falu fala hu'a olapate'a getapimo o'afisayana Goti'a kavatie'mo ohau'niye, hu'a agesayafe'mo apataletapa ugefe'mo nehutapae'mo lapaiyalegati'mo mumusopamo alitapa fopo hutaletapa viyo. Lama ge lapa nepauve, Goti'a agoti huno apatesiya afina'mo Sotomi taonifi'e Gomola taonifi'e'mo mai'naya vaya'mogi mago hosu ya'mo aligaya'monanafa ani taonifi'mo mai'nisaya vaya'mogi mago'e hu'a lusi hosu ya'mo aligae, huno hapa pai'niye. ¹²U'apae'mo, lapaipamo alitapa afe leyo, hu'a Goti ge'amo hapa pai'nae. ¹³Apakaemo vaya'ai apaipafati'mo asole hosu apaune vaya'mo ali'a hapa fai'a apatalege kaita hapau'niya vaya'aite'mo uvelimo fale'a apate'ne'a ali'a hapage'a apatege hu'nae.

Ani'mo faleno ne'apateya Yoni'mo ago fali'niya gemae

(Mt 14:1-12; Lu 3:19-20; 9:7-9)

¹⁴Muki haopalegamo mai'naya vaya'mogimo Yesu agi'amo afi'nageno'ae'mo gamani vekamo yagaino ne'apateya vekamo Heloti'e'mo afi'niye. Afiten'o'ae'mo, Yoni'a ani faleno ne'apateya vekamo kanolufati'mo ago he ti'niya'mofe'mo aipafati'mo himamu'aleti'mo no'agaya lokiya kava'mo nehiye, huno hu'niye. ¹⁵Mago vaya'amogi hu'apae'mo, Ilaiya'a mai'niye, hu'a hu'nage'a mago vaya'amogi hu'apae'mo, Gotitegati gemo alinineno aeno hakalo huno hapa nepaiya vekamo akeya'vilaga vaya'mo Gotitegati gemo alini e'a ae'a hakalo hu'a hapa pai'naya vayakana huno mai'niye, hu'a hu'nae. ¹⁶Ani gemo hu'naya'monanafa Heloti'a huno'ae'mo, Yoni'a lugo'amo ago he'na hatagau'na atale'nova vekamo kanolufati'mo ago he ti'niye, huno hu'niye.

^{17,18}Hogoteno Heloti'a ati vaya'mo alino apate'nige'a u'a Yoni'a atafau'a kalavusi hu'a ate'nae. Heloti'a agana'amo'mo Filipi a'mo agi'amo Helotiyasitefe'mo kalavusi huno ate'niye. Heloti'a Helotiyasi'mo ali'nigeno Yoni'a, kaganakamo a'mo ali'nana kava'mo Goti ke'aepa gemo ago amagika atale'nane, huno ha pai'nigeno'ae'mo ¹⁹Helotiyasi'a Yonife'mo hosu aipamo kali'nigeno amagigefe'mo hu'niya'monanafa afa'a o'amagi'niye. ²⁰Heloti'a, Yoni'a aote vekamo fatago kava'age'mo nehiya nene, huno agesamo afiten'o Yonife'mo koli huteno yagaino ate'niya'mofe'mo Helotiyasi'a afa'a o'amagi'niye. Heloti'a Yoni ge'amo afiten'o asole kavatefe'mo akame huteno mago'e huno ge'amo afisiyafe'mo hau'niye. ²¹Heloti'a ita'amo'mo alino ate'niya afina'mo halate afole ai'nigeno yagita hu'nige'apae'mo yagai'a ne'apataya gamani vayanagi ati vaya'aite'mo yagai'a ne'apataya vayanagi Galeliya kotega ala apaki vayanagi hu'a e'a ani ne'ya'mo ne'nae. Ani afina'mo Helotiyasi'a Yoni'mo

amagisiya ka'mo ago age'niye. ²² Helotiyasi'a a'mafa'ne'amo'mo yagita hu'naya nopi'mo haineno oae'nige'apae'mo Heloti'e magokepi lokae'a mai'naya vaya'mogi'e'mo agete'apae'mo amuse hu'a atete'a yagaino ne'apateya kini vekamo'a, na agufa yafe'mo kahau'nisifigi naha paiyo afa'a kamiguve. ²³ Yagaika ne'apatana yapati'mo folagapati'mo alika fako huka magokayaga'amo namiyo, huka hisana'mo'mo afa'a ali'na fako hu'na kamiguve, huno ago'yamo ataleno ha pai'niye. ²⁴ Ani a'mafa'nemo'mo uno ita'amofe'mo, na agufa ya'mo namiyo, hu'na hisuve, huno afi ge'nigeno'ae'mo, Yoni'a ani'mo faleno ne'apateya vekamo lugo'amo heka hatagauka agenopa'amo alinikeka namiyo, huka ha paiyo, huno ha pai'niye. ²⁵ Malage huno uno kini vekae'mo, kagaemo Yoni'a ani'mo faleno ne'apateya vekamo lugo'amo heka hatagauka agenopa'amo alika yuvapafi'mo maletaka alinikeka namiyo, huno ha pai'nigeno'ae'mo ²⁶ kini vekamo'a lusi kava huno aipamo'mo kana hu'niye. Hu'niya'monanafa hogoteno ago'yamo ataleteno ge hu'nige'a magokepi'mo lokae'a mai'naya vaya'mogimo ago age'naya'mofe'mo ha'ao huno hisiyafe'mo ohau'niye. ^{27,28} Kini vekamo'a malage huno ati vekae'mo, uka Yoni lugo'amo heka hatagauka agenopa'amo yuvapafi'mo alika maleka alinika eno, huno ha paiteno alino ate'nigeno kalavusi nopati'mo haino Yoni lugo'amo heno hatagauno agenopa'amo yuvapafi'mo alino maleno alinineno ani a'mafa'nemo ami'nigeno alininuno ita'amo'mo ami'niye. ²⁹ Yoni ge'amo ne'afiya vaya'mogi ani gemo afite'apae'mo e'a agufa'amo alini'u'a ki'a ate'nae.

Apa vaya'mo atagi ne'e'a mai'nageno Yesu'a faefu tauseni'a vaya'mo ne'ya'mo apami'niya gemae

(Mt 14:13-21; Lu 9:10-17; Yo 6:1-13)

³⁰ Ki'a atetage'apae'mo apa vaya'mo alino apate'nige'a u'nayategati'mo ai'a atagi ne'a Yesutegamo e'a ali'a anupa hu'a mai'ne'apae'mo ma kava'mo hu'none ma gemo alita apaya male'none, hu'a ha pai'nae. ³¹ Ha pai'nageno'ae'mo, lagai'atige'mo ka'me kotegamo mago afina'mo uta maita falu hugune, huno hapa pai'niye. Asole vayako'mo u'e'a hu'nage'apae'mo ne'ya'mo nesaya kana'apimo alagi ohane'niya'mofe'mae. ³² Huno hapa pai'nige'a sipifi'mo hai'a maite'a apakai'apige'mo ka'me kotegamo u'naya'monanafa ³³ asole vaya'mogi ago apakete'apae'mo, apakaemae, hu'a hute'a asole taonifati'mo nagu nagu hu'a u'nae. U'a ae'a apaka se'a u'a hogote'a ava'yi hu'nageno ³⁴ Yesu'a sipifati'mo emineno apakeyana asole vaya'mo e'a mai'nageno apaketenoe'ae'mo, sipisipile ne'yagaiya vekamo o'mai'nige'a afa sipisipigana hu'a mai'nae, huteno hau huno apateteno aepa faino alino apaya male'niye. ^{35,36} Yegemo lamino falegefe hu'nige'apae'mo ge'amo ne'afiya vaya'mogi e'a ha pai'apae'mo, ka'me kotegamo eta mai'nona'mofe'mo ne'ya'apimo ohane'nigeno yegemo lamino falegefe hu'nigi alika apatege'apao u'e'a hu'a hoyalegati'e taonifilagati'e'mo ne'ya'apimo

miya faiyo, hu'a ha pai'nae. ³⁷Ha pai'nageno'ae'mo, lapakaemo ne'ya'mo apamiyo, huno hapa pai'nige'apae'mo, lagaemo ne'ya'mo apamisuna ya'mo ohane'niyanageta tu hataleti kinaleti'mo uta peleti mayamo miya failiteta apamisunafe'mo kahau'nifiye, hu'a afi ge'nae. ³⁸Afi ge'nageno'ae'mo, Lapakaemo na magi peleti mayamo ali'nae. Utape ageyo, huno hu'nige'a u'a agete'apae'mo faefu'a peleti maya'e lole noyamela'e'mo hane'niye, hu'a ha pai'nae.

³⁹Agaemo, lapaote lapaote hutapa kahaule'mo itopale maiyo, hutapa hapa paiyo, huno hapa pai'niye. ⁴⁰Ani kava'mo hu'a fifiti'a vaya'mo maige vani hataleti'a vaya'mo maige hu'a kahaule'mo itopale'mo mai'nae. ⁴¹Agaemo faefu'a peleti maya'e lole noyamela'e'mo ali'nenno alino maku huno koku'napi'mo ageteno hao ke heteno'ae'mo peleti mayamo alino akaya heno ge'amo ne'afiya vaya'aina apami'nige'a ali'a apami'nae. Ani kava'mo huno lole noyamela'e'mo alino akaya heno apami'niye. ⁴²Apami'nige'a ali'a apami'nage'a ne'a apamu hu'nae. ⁴³Ge'amo ne'afiya vaya'mogi ne'a apamu hute'a atalaya atupa'amo ali'a tuolofu'a honafa yuvapafi'mo male'a havai te'nae. ⁴⁴Faefu tauseni'a agufa vaya'mogimo ani ne'ya'mo ne'nae.

Yesu'a ani agotofule'mo e'niya gemae

(Mt 14:22-23; Yo 6:16-21)

⁴⁵Yesu'a malage huno ge'amo ne'afiya vaya'aife'mo, sipifi'mo uta haitetapa ani faliga Metasaita taonifi'mo utapa hogo netege'nao, huno hapa paiteno asole vaya'mo alino apate'nige'a u'nae. ⁴⁶Utageno Yesu'a nunumu'mo hisayafe'mo avefi'mo hai'niye. ⁴⁷Hani hu'nige'apae'mo ge'amo ne'afiya vaya'mo sipifi'mo ani kotu folagapi'mo ne'vageno'ae'mo Yesu'a agai'age'mo mopafi'mo mai'niye. ⁴⁸Mai'nenno'ae'mo apakeyana yasimo'mo alino ago'ya fai'nige'apae'mo latapa kayoteti'mo ani'mo avale'a ali'a apakamelaga ataleme ataleme u'nayana afa'a o'u'nae. Kotigefe'mo nehigeno'ae'mo apakaetegamo ani agotofule'mo eno aeno apaka seno visiyafe'mo ⁴⁹ani agotofule'mo ne'ege'a agete'apae'mo, afene, hu'a apakesamo afite'a avovo hu'nae. ⁵⁰Muki'amogimo agete'a lusi kava hu'a koli hu'naya'mofe'mae. Mai'nageno'ae'mo Yesu'a malage huno hapa paino'ae'mo, lokiya waitapa maiyo. Nagaekemo ne'ovanagi koli osiyo, huno hapa paiteno ⁵¹sipifi'mo haineno apakae'e'mo magokepi mai'nigeno yasimo alino hano hu'nige'apae'mo lusi kava hu'a hapau ai'nae. ⁵²Yesu'a aise peleti mayaleti'mo alino mago'e peleti mayamo alo huno apami'niya kavafe'mo alagepa hu'a apakesamo o'afi'naya'monanafa apakesamo ago akani'niya vayakana hu'a mai'naya'mofe'mo yasimo alino hano hu'nige'apae'mo hapau ai'nae.

Yesu'a Genesaleti kotegamo uno kaita hapau'niya vaya'mo alino hapageno apate'niya gemae

(Mt 14:34-36)

⁵³Ani'mo lakae'u'a Genesaleti kotegamo ava'yi hute'apae'mo sipimo nofi ae'a ate'nae. ⁵⁴Sipifati'mo u'a lami'nage'a agete'apae'mo Yesu'mae,

hu'a age'nae. ⁵⁵ Agete'a anile mai'naya vaya'mo nagu nagu hu'a u'e'a hu'a muki aupilagati'mo kaita hapau'niya vaya'aina hi'yopa kayo'apile'mo ali'a havae'a apatete'a Yesu'a ani aupilagamo mai'niye, hu'a hu'naya yategamo apavaleli'a e'nae. ⁵⁶ Yesu'a aise taonifinagi alopataonifinagi muki aupilagagi huno umenitata huno mai'nige'apae'mo kaita hapau'niya vaya'aina apavaleli'e'a maketi kumate'mo apate'nage'a mai'ne'apae'mo kaita hapau'niya vaya'mogimo ge hu'apae'mo, kahao ke honanageta kukenakamo atupa'ale'mo ame aligesune, hu'a hute'a ame ali'nae. Muki ame ali'naya vaya'ai kaita'apimo alino hapageno apate'niye.

Yu vaya'mogi apakinago vaya'aife'mo hu'niya gemae
(Mt 15:1-9)

7 ¹ Falasi mono vaya'e ke'aepa gemo avo'mo kae'a ali'a apaya ne'malaya vaya'e'mo Yulusalemu kotegati'mo Yesutegamo e'a ali'a anupa hu'a mai'nae. ² Mai'ne'apae'mo apakayana mago Yesu ge'amo ne'afiya vaya'mogi Yu mono gemo akame hu'a apaya'mo sese osu'ne'a ne'ya'mo afa'a ali'a ne'nage'a apakete'apae'mo, hosu kava'mo nehae, hu'a hu'nae. ³ Falasi mono vaya'e muki Yu vaya'mogi'e'mo apakinago vaya'ai ge'apimo akame hisayafe'mo apaya'mo sese osu'nisayana ne'ya'mo afa'a ali'a o'negae. ⁴ Maketi kumategati'mo e'apae'mo apaya'mo sese osu'nisayana ne'ya'mo afa'a ali'a o'negae. Apakaemo apakinago vaya'ai ke'aepa gemo asole gemo akame hute'a kapu'apigi samo'apigi yuvapa'apigi hipa'apigi hu'a sese nehae. ⁵ Falasi mono vaya'e ke'aepa gemo avo'mo kae'a ali'a apaya ne'malaya vaya'mogi'e'mo Yesufe'mo ani kavafe'mo, Na kava hige'apae'mo gekamo ne'afiya vaya'mogi lagingo vaya'ai ke'aepa gemo akame hu'a apaya'mo sese osu'ne'a ne'ya'mo fiku ali'a ne'nae, hu'a afe'nae. ⁶ Hu'a afe'ne'nae'ae'mo, Aiyeya'a lapakaefe'mo alagi lama gemo Gotitegati'mo ali'niye. Lapakaemo aetapa ati nekaya vayane. Aiyeya'a huno'ae'mo,

Ani vaya'mogi apavaya'aletike'mo nagi'nile'mo ali'a asaga hu'a ne'nataya'monanafa apaipa'amo'mo afagi'ale'mo hane'niye.

⁷ Nagaefe'mo fikumo mono nehae. Vaya'mogimo afisayafe'mo ma mopafi vaya'ai ke'aepa gemo ali'a apaya ne'malae,

huno avo'mo kae male'niye. ⁸ Ani gelefe'mo lapakaemo Goti ke'aepa ge'amo ataletapa ma mopafi vaya'ai ge'apimo akame nehae. Akame nehutapa kapugi samogi muki yanagi hutapa sese nehae. ⁹ Goti ke'aepa ge'amo ataletapa lapakinago vaya'ai ke'aepa gemo akame hisayafe'mo alagepa hutapa afi'nae, huno ke avoya gemo hu'niye. ¹⁰ Mosese'a huno'ae'mo, *Itatapi afotapimogi apaki'apile'mo alitapa asaga hutetapa apaiyafi'mo maiyo. Mago vaya'mogimo ita'api afo'apimogife'mo hu'a faipa hu'a apatesayana kamiti apamagige'a faliyo, huno hu'niye.* ^{11,12} Huno hu'niya'monanafa mago vekamo'mo ita'amofe'mofi afo'amofe'mofi, kaha

maesiya kagemi ya'nimo Goti'mo amisuva yake'mo hane'niyanage'na olanamiguve, huno hana paisiya'mo'mo lapakaemo, he, kanalene, huta hutetapae'mo, ita'amo'mofi afo'amo'mofi huno hana o'maegaiye, hutapa nehae. ¹³Ani agufa gemo hutetapae'mo Goti ge'amo ago amagita ataletetapa lapakinago vaya'ai gege'mo akame nehae. Mago'e hutapa ani agufa kava'mo nehae, huno hu'niye.

Vaya'mo alino hosu huno ne'apateya kavafe'mo hu'niya gemae
(Mt 15:10-20)

¹⁴Yesu'a halate muki vaya'aife'mo ge hu'nige'a e'a ali'a anupa hu'a mai'nageno'ae'mo, Ge'nimo afitapa aeto hiyo. ¹⁵Malaga hane'nisiya ya'mo'a vaya'ai apakupafi'mo nelamisiyana vaya'mo alino hosu huno o'apategaiya'monanafa apaipafatike'mo haineno apavayafati'mo afole aisiya gemoke'mo vaya'mo alino hosu huno apategaiye. ¹⁶Gemo afisaya lapakesamo hane'nisiyana mani gemo afiyo, huno hapa pai'niye. ¹⁷Agaemo muki ve a'nemo apatalenuno haino nopi'mo mai'nige'apae'mo ge'amo ne'afiya vaya'mogi aeno kalafefa ge'amo aepa'ae'mo ge hu'a afi ge'nae. ¹⁸Afi ge'nageno'ae'mo, lapakae'e'mo afitapa aeto nosafiye. Muki malaga hane'nisiya ya'mo'a lamino apakupafi'mo hane'neni alino hosu huno o'apategaiye, hutapa o'afi'nafiye. ¹⁹Apaipafi'mo nolamifa apakupafike'mo nelamige'a ago aifa le'a ne'atalaya'mofe'mo alino hosu huno o'apategaiye. Ani kava'mo huno apakupamo'mo muki ne'ya'mo alino alagepa huno ne'ate, huno hapa pai'niye ²⁰Yesu'a mago'e gemo huno'ae'mo, mago vekamo'a agai'a aipafati'mo haineno afole ne'aiya ya'moke'mo agai'amo alino hosu huno ne'ate. ²¹Apakufafi'mo hane'niya ya'mo apaipafati'mo hosu apakesamo afole aige kumai kava'mo afole aige a'mafa'nemo ne'aliya kava'mo afole aige vaya'mo nehapaya kava'mo afole aige ²²kumaya ne'aliya kava'mo afole aige hapa'ye nehiya kava'mo afole aige muki agufa agafa hosu kava'mo afole aige aigofe kava'mo afole aige ge o'afi'a kumai kava'mo nehaya kava'mo afole aige apakete'a apaipa kafamo nehapaya kava'mo afole aige hu'a faipa hu'a ne'apataya gemo afole aige himu'namu kava nehaya kava'mo afole aige negi nagi kava'mo afole aige huno afole ne'aiye. ²³Asole ani agufa hosu kava'mo apaipafati'mo afole aiteni vaya'aina alino hosu huno ne'apate, huno hapa pai'niye.

Mago a kanomo'mo Yesufe'mo agha afino fatago hu'niya gemae
(Mt 15:21-28)

²⁴Yesu'a mani kotegamo ataleno Taiya taoni'e Saitoni taoni'e'mo hane'na'a haopalegamo u'niye. Uno mago nopi'mo haino mai'neni'ae'mo mago vekamo'mo, Yesu'a ani nopi'mo eno mai'niye huno hisiyafe'mo ohau'niya'monanafa ago age'nae. ^{25,26}Mago a kanomo'a Yesu ava

gemo afiteno eno'ae'mo aiyafi'mo ale'ya faino ape huno mai'niye. Ani a kanomo a'mafa'ne'amo aipafi'mo hosu aune vekamo mai'niye. Ani a kanomo Yu nofi a kanomo o'mai'nifa Galiki nofi a'mo mai'nigeno ko'amo Siliya Finisiya kotegamo hane'niye. Agaemo Yesufe'mo ina gemo huno afi ge'niye. Kahao ke hovanagi hosu aune vekamo a'mafa'ne'nimo aipafati'mo alika hafaika atalo, huno afige afige huno mai'nigeno Yesu'a ha paino'ae'mo, ²⁷hogote'a mafa'nemogimo ne'ya'mo ne'a apamu hugae. Mafa'nemogi nesaya ne'yapati'mo ali'na kalamo apamisuvana kanale osugiye, huno ha pai'nigeno'ae'mo, ²⁸Ala kava nene, huno, lama gemo hu'nana'monanafa hi'yalamu'mo afe'alumelagamo kalamo mai'ne'a mafa'nemogi nete'a atalaya ne'ya atupamo ne'naya yane, huno ha pai'nigeno'ae'mo, ²⁹ani gemo nehana'mofe'mo nokalegamo afa'a uvo. Hosu aune vekamo a'mafa'nekamo aipafati'mo ago ataleno u'niye, huno ha pai'niye. ³⁰Ha pai'nigeno no'alegamo uno ageyana a'mafa'ne'amo hipale'mo afa'a havaeno mai'nigeno age'niye. Hosu aune vekamo aipafati'mo ago ataleno u'niya'mofe'mo afa'a havaeno mai'niye.

**Yesu'a mago agesamo akani'nigeno age no'aiya
vekamo alino alagepa huno ate'niya gemae**

³¹Yesu'a Taiya haopalegati'mo atalenuno Saitoni taonimo aeno aga senuno mago'e huno naya lole'a taonimo aeno aga senuno Galeliya ani kotu haopale'mo uno ava'yi hu'niye. ³²Mago vaya'mogimo agesamo akani'nigeno age no'aiya vekamo avaleli'a Yesutegamo e'apae'mo, kahao ke honanagi agufale'mo kaya'mo male'neka alika alagepa huka ato, hu'a afi ge'nageno'ae'mo ³³Yesu'a muki vaya'aina anile'mo apataleno ani vekamo agai'age'mo avalelinuno ati yagaina ayatalateti'mo agesa katalapi'mo vaiteno ati yagaina ayate'mo avi'na heteno avenafu'nale'mo male'niye. ³⁴Male'nenno koku'nategamo alino maku huno ageteno avamusamo aitenno agai'a gefati'mo huno'ae'mo, efata ani gemo huno aika halo aiyo, huno ha pai'nigeno ³⁵agesamo aino halo ai'nigeno avenafu'nale'mo atafauno ne'maiya ya'mo ataleno u'nigeno agemo alagepa huno ai'niye. ³⁶Yesu'a, ani kavafe'mo ava gemo hutapa hapa opaiyo, huno hapa pai'niye. Mago'e mago'e huno ani gemo hapa pai'niya'monanafa o'afi'a mago'e hu'a ava gemo hulitata hu'a hapa pai'nae. ³⁷Hapa pai'nage'apae'mo muki vaya'mogi afite'a lusi kava hu'a hapau aite'apae'mo, muki nehiya kava'amo alagepa kava'age'mo nehiye, hu'a hute'a, Apakesamo akani'niya vaya'aina alino halo aino apatege apake no'aiya vaya'aina alino alagepa huno apatege nehiye, hu'a hu'nae.

**Yesu'a fo tauseni'a vaya'mo ne'ya'mo apami'niya gemae
(Mt 15:32-39)**

8 ¹Aise afina'mo utege'a halate asole vaya'mo e'a ali'a anupa hu'a mai'nae. Ne'ya'apimo ago hano hu'nigeno Yesu'a ge'amo

ne'afiya vaya'aife'mo ge hu'nige'a e'nageno'ae'mo, ²muki vaya'mo nagae'e'mo lole'e mago'e afina'mo lokae'a mai'nageno ne'ya'apimo ohane'niya'mofe'mo nahau hu'na ne'apatove. ³Mago vaya'amo afagitegati'mo e'naya'mofe'mo ne'ya'mo o'apami'ne'na no'apilegamo fiku ali'na apatesuge'a usayategamo u'a kategamo apaunena aisige'a asagau'a aigae, huno hapa pai'niye. ⁴Huno hapa pai'nige'apae'mo ge'amo ne'afiya vaya'mogimo, ka'me kotegamo eta mai'nona'mofe'mo muki vaya'mo apamisuna ne'ya'mo haiyategati'mo aligune, hu'a afi ge'nageno'ae'mo, ⁵na magi peleti mayamo ali'nae, huno apafi ge'nige'apae'mo, seveni'a peleti mayamo hane'niye, hu'a ha pai'nae. ⁶Agaemo muki vaya'aife'mo hapa paino'ae'mo, mopale'mo maiyo, huno hapa paiteno seveni'a peleti mayamo ali'neni Gotife'mo hao ke heteno lo aeno ge'amo ne'afiya vaya'aina apami'nige'a ali'a apami'nae. ⁷Agaemo aise aise noyame ali'naya noyamemo ali'neni Gotife'mo hao ke heteno ge'amo ne'afiya vaya'aife'mo huno'ae'mo, alitapa apamiyo, huno hapa pai'niye. ⁸Muki vaya'amogimo ne'a apamu hute'a ne'ya atupa'amo ali'a seveni'a honafa yuvapafi'mo male'a havai te'nae. ⁹Fo tausen'i'a agufa vaya'mogimo ne'nae. Netageno alino apatege'a u'nae. ¹⁰Utageno ge'amo ne'afiya vaya'e'mo sipifi'mo hai'a maite'a Nalamanuta haopalegamo u'nae.

**Falasi mono vaya'mogimo, no'agona kava'mo alika lave liyo,
hu'a hu'naya gemae
(Mt 16:1-4)**

¹¹Mago Falasi vaya'mo Yesutegamo e'a mago geleti'mo aepa fai'a ge kavetamo hu'nae. Hu'apae'mo, koku'nategati'mo no'agona lokiya aune kava'mo alika lave ligeta ageno, hu'a amalageka hu'a afi ge'nae. ^{12,13}Yesu'a avamusa'mo aiteni'ae'mo, na kava hige'apae'mo hemeni afina'mo mai'naya vaya'mogi hu'apae'mo, no'agona lokiya aune kava'mo alika lave liyo, hu'a nehae. Alagi lama gemo lapa nepauve, huno, nagaemo mago aune kava'mo hemeni afina'mo mai'naya vaya'aina ali'na apave oliguve, huno hapa paiteno apataleno halate sipifi'mo haino maiteno mugagaya faligamo lakaeno u'niye.

**Heloti'e Falasi vaya'mogi'e'mo nehaya kavafe'mo hu'niya gemae
(Mt 16:5-12)**

¹⁴Ge'amo ne'afiya vaya'mogimo peleti mayae'mo apake kani'nige'a o'ali'a u'nageno sipifi'mo magoke peleti mayatomo hane'niye. ¹⁵Yesu'a ina gemo lokiya gemo huno hapa pai'niye. Alagepa hutapa yagaiyo. Falasi vaya'ai peleti mayafi'mo aeno apafu neleya ya'e Heloti akame nehaya vaya'ai peleti mayafi'mo aeno apafu neleya ya'efe'mo ehetafiye, huno hapa pai'nige'apae'mo ¹⁶apakai'apimo ge huge afige hu'apae'mo, peleti mayatimo ohane'niya'mofe'mo mani gemo nehiye, hu'a hu'nageno'e'mo

¹⁷Yesu'a ani gemo ago afi'niya'mofe'mo, na kava higetapae'mo peleti mayamo o'ali'naya kavafe'mo ge huge afige nehae. Hu'nova kava'mo agetapa aeto osutapa maima maima etapa hemeni'e'mo agetapa aeto osu'nafiye. Lokia lapaipamo haneme haneme eno hemeni'e'mo ani agufa lapaipage'mo hane'nifiye. ¹⁸Lapaulagamo hane'niya'monanafa o'age'nafiye. Lapakesamo hane'niya'monanafa o'afi'nafiye. Hu'nova kavafe'mo ago lapake kani'nifiye. ¹⁹Nagaemo faefu'a peleti mayamo ali'na akaya he'na faefu tauseni'a vaya'mo apami'nogetapae'mo atupa'amo alitapa na magi honafa yuvapafi'mo maletapa havai te'nae, huno apafi ge'nige'apae'mo, tuolofu'ae, hu'a ha pai'nae. ²⁰Nagaemo seveni'a peleti mayamo ali'na akaya he'na fo tauseni'a vaya'mo apami'nogetapae'mo atupa'amo alitapa na magi honafa yuvapafi'mo maletapa havai te'nae, huno apafi ge'nige'apae'mo, seveni'ae, hu'a ha pai'nae. ²¹Agaemo, ageme ageme etapa mai'nayana hemeni'e'mo o'age'nafiye, huno apafi ge'niye.

**Yesu'a Metasaita taonifi'mo uno aulagamo ali hu'niya
vekamo alino ayakeno ate'niya gemae**

²²Apakaemo u'a Metasaita taonifi'mo ava'yi hu'nage'apae'mo mago vaya'mogi aulagamo ali hu'niya vekamo aveleli'a Yesutegamo e'apae'mo, kahao ke honanagi agaete'mo kaya'mo malo, hu'a ha pai'nageno ²³ani aulagamo ali hu'niya vekamo ayate alino avelelino taoni malaga u'niye. Uno avenatu'na heteno ayatala'mo aulagalate'mo maleteno'ae'mo, mago ya'mo ne'agapiye, huno afi ge'niye. ²⁴Afi ge'nigeno alino maku huno ageteno'ae'mo, apakovana vaya'mo yosagana hu'a mai'ne'a umenitata nehae, huno ha pai'nigeno ²⁵halate ayatala'mo aulagalate'mo male'nen'ae'mo, alika maku huka ago, huno hu'nigeno aulagala'mo ageno ayaketeno muki ya'amo ageno alagepa huno age'niye. ²⁶Yesu'a no'alegamo alino ateteno'ae'mo, ukae'mo taonifi'mo uka ohaika taonifi'mo mai'nisaya vaya'aife'mo hapa opaiyo, huno ha pai'niye.

**Pita'a Yesufe'mo, Kalaisigamo mai'nane, huno hu'niya gemae
(Mt 16:13-20; Lu 9:18-21)**

²⁷Yesu'e ge'amo ne'afiya vaya'e'mo Sisaliya Filipai kotegamo hane'niya taoni'afi taoni'afi'mo ugefe'mo kategamo ne'u'apae'mo, vaya'mogimo nagaefe'mo, ina la'nae, hu'a nehae, huno apafi ge'nige'apae'mo, ²⁸Mago vaya'amogi kagaefe'mo hu'apae'mo, Yoni'a ani'mo faleno ne'apateya vekamo mai'niye, hu'a huge mago vaya'amogi, Ilaya'a mai'niye, hu'a huge mago vaya'amogi, Gotitegati gemo alini e'a ae'a hakalo hu'a hapa nepaiya vayapati vekamo mai'niye, hu'a huge hu'a nehae, hu'a ha pai'nae. ²⁹Ha pai'nageno'ae'mo, Ani gemo hu'a nehaya'monanafa lapakaemo nagaefe'mo ina la'nae, hutapa nehae, huno apafi ge'nigeno Pita'a ha paino'ae'mo, Goti'a huno'ae'mo, Kalaisi

ne'mo ali'na atesugeno emineno ma mopafati'mo afole aigiye, huno hu'niya vekamo Kalaisigamo mai'nane, huno ha pai'niye. ³⁰Huno ha pai'nigeno Yesu'a, ina la'namofi hutapa mago vekae'mo alagi ha opaiyo, huno hapa pai'niye.

Yesu'a, falite'na halate he tiguve, huno hu'niya gemae
(Mt 16:21-28; Lu 9:22-27)

³¹Ani afina'mo Yesu'a aepa faino alino apaya ne'maleno'ae'mo, Vemo mafa'nemo'a muki alu kana ya alu kana ya'mo ne'alisige'apae'mo vayatama vayanagi mono hu'a ne'apataya vaya'aite'mo yagai'a ne'apataya vayanagi ke'aepa gemo avo'mo kae'a ali'a apaya ne'malaya vayanagi hu'a apakame'yamo amisage'apae'mo kamiti amagisageno faliteno lole'e mago'e afina'mo utesigeno halate ago he tigiye, huno hapa pai'niye. ³²Yesu'a ani gemo huno afole aino hapa pai'nigeno Pita'a amasage huno avalelinuno ge hauno'ae'mo, ani hana agufa hosu kate'mo visanafe'mo kagesamo o'afiyo, huno ha pai'nigeno ³³aino afe leno ge'amo ne'afiya vaya'aina aulu hapaeno apake'neno Pitafe'mo ge hauno'ae'mo, Sataniyo, huno, ataleka nakamelegamo uvo. Goti'a agesa afi'niya kavafe'mo kagesamo o'afi'napa ma mopafi vaya'mogimo apakesamo ne'afiya agufa kavafe'mo kagesamo afi'nane, huno ha pai'niye. ³⁴Agaemo muki vaya'e ge'amo ne'afiya vaya'efe'mo ge hu'nige'a e'nageno hapa paino'ae'mo, ina lagimo nakame hisayafe'mo hu'nisafi apakai'apimo hapau'niya kavafe'mo ha'ao, hute'a atale'a malipu yosa'apimo ali'a kofili'a nakame hiyo. ³⁵Ina lagimo ma mopafi'mo alagepa hu'a maige maige hu'a maisaya kavate'mo yagai'a ate'a mai'nisafi falisageno'ae'mo alagepa hu'a ne'maiya kava'apimo alagi hano hugiye. Ina lagimo nagaetefenagi alagepa faigoko ge'nilefenagi hu'a alagepa hu'a ne'maiya kava'apimo atale'nisayana alagepa hu'a maisaya ya'apimo aligae. ³⁶Mago vekamo'a muki ma mopafi hane'niya ya'amo alino hano hu'niya'monanafa auneme'amo lageso hisiyana akamelegati mago'e ya'mo ali'nifiye. Ha'ao, o'ali'nifa hogote ya'mo ago atale'niye. ³⁷Auneme'amo lageso hisiyana na agufa miyateti'mo halate miya faino aligiye. ³⁸Hemeni afina'mo mai'naya vaya'mogi anau'apimo'mo atale'a kumai he'a ne'vaya a'negana hu'a mai'nae. Ani vayapati'mo ina lagimo nagae'e ge'nile'efe'mo apavagage nehisifigeno Vemo mafa'nemo'a Afo'amotegati'mo ha le konali ya'amo aliteno apaote enisole vaya'ale'mo eminesiya afina'mo apakaefe'mo avagage hugiye, huno hapa pai'niye.

9 ¹Huno hapa paiteno'ae'mo, Alagi lama gemo lapa nepauve, huno, hemenimo mai'naya vayapati'mo mago vaya'amo ofali'a afa'a mai'ne'a Goti'a yagaino ne'apateya kava'mo himamu'aleti'mo alino afole aino atesige'a agegae, huno hapa pai'niye.

Kalaisi'a aeto agufa agufamo alino hamale'niya gemae
(Mt 17:1-13; Lu 9:28-36)

^{2,3}Sigisi'a afina'mo utegeni Yesu'a Pita'agi Yemisi'agi Yoni'agi huno apavalelinuno yatala avefi'mo apakai'apige'mo hai'nae. Hai'a

mai'ne'apae'mo agayana Yesu'a aeto agufa agufamo ali'nigeno apaulagale'mo kukena'alegati'mo aeno lata late nehuno yaveyave'age'mo hu'niye. Mago ma mopafi vekamo'a kukena'amo sese hisigeno'ae'mo ani agufa yaveyave osisiya agufa kava'mo hu'niye. ⁴Apakaemo anakayana Ilaya'e Mosese'e'mo afole aite'ana Yesu'e'mo ge huge afige hu'a mai'nae. ⁵Pita'a, Tisao, huno, manile'mo maisunana kanale hu'niye. Lole'e mago'e hage no'mo kigune. Kagae no'mo kite Mosese no'mo kite Ilaya no'mo kite huta kigune, huno ha pai'niye. ⁶Lusi kava hu'a koli hu'a mai'naya'mofe'mo Pita'a na agufa gemo hugufi, huno agesamo o'afino fiku gemo hu'niye. ⁷Hu'nigeno hiya'mo kino apati kae'nigeno ani hiyapati'mo mago gemo huno'ae'mo, ani vekae'mo nahau nayamopafi'mo ne'nahaiya mafa'ne'nimo mai'nigi ge'amo afiyo, huno hapa pai'niye. ⁸Malage huno muki haopalegamo alino ha le'nige'a age'nayana lole vekala'mo o'anake'nafa Yesu'a agai'age'mo mai'nige'a age'nae. ⁹Aveleti'mo atale'a u'a nelami'apae'mo Yesu'a, age'naya kavafe'mo ava gemo hutapa hapa opaitapa maime maime ne'vigeno'ao Vemo mafa'nemo kanolufati'mo he tisiya afnake'mo ava gemo hutapa hapa paiyo, huno hapa pai'niye. ¹⁰Ani gemo afite'apae'mo mago vaya'aife'mo ava gemo hu'a hapa opai'a apakai'apige'mo kanolufati'mo he tisiya kavafeke'mo ge huge afige hu'a mai'nae. ¹¹Apakaemo Yesufe'mo, Na kava hige'apae'mo ke'aepa gemo ali'a apaya ne'malaya vaya'mogi hu'apae'mo, Ilaya'a hogoteno afole aitesigeno'ae, hu'a hu'nae, hu'a afi ge'nageno'ae'mo, ¹²He, Ilaya'a muki kava'mo alino api aino atesiyafe'mo hogoteno ago afole aigiya'monanafa na kava higeno'ae'mo, Vemo mafa'nemo'a muki alu kana ya alu kana ya'mo ali'nisige'apae'mo, ina agufa vekamo mai'niye, hu'a hute'a agi'ale'mo ali'a afepi ategae, huno avo'mo kae male'niye. ¹³Lapa nepauva'monanafa Ilaya'a ago afole ai'nige'apae'mo agaetegamo hapau'niya agufa kava'mo ago hu'a amagi'nae. Goti mukufi'mo avo'mo kae male'niya gemo'a ani kavafe'mo hu'niye, huno hapa pai'niye.

**Yesu'a hosu aune vekamo aipafi'mo mai'niya mafa'nemo alino alagepa
huno ate'niya gema
(Mt 17:14-21; Lu 9:37-43)**

¹⁴Apakaemo ge'amo ne'afiya vaya'aitegamo e'a apakayana asole vaya'mogimo faila ku ai'a apake'a mai'nage'a ke'aepa gemo avo'mo kae'a ali'a apaya ne'malaya vaya'e'mo ge vai'nae. ¹⁵Ani asole vaya'mogimo Yesu'a e'nige'a agete'apae'mo hapau aite'a malage hu'a nagu nagu hu'a u'a ge amamae'nae. ¹⁶Agaemo huno'ae'mo, na agufa kavafe'mo apakae'e'mo etapa ge huge afige hutapa mai'nae, huno apafi ge'nigeno'ae'mo ¹⁷asole vayapati'mo magoke vekamo'a Yesu ge'ale'mo aeno atagaina huno ha paino'ae'mo, Tisao, huno, hosu aune vekamo'a ve mafa'ne'nimo avayamo alino akani male'nige'nae'mo kagaetegamo avaleli'na ne'ove. ¹⁸Hosu aune vekamo'a muki aupilagamomenitata

nehigeno'ae'mo atafauno alino mopafi yaga auno atale'nigeno avayafati'mo avenatu'na'mo'a hu'nigeno avepi'mo haniteno agufamo alino lokiya vaiteno ne'maiye. Nagaemo gekamo ne'afiya vaya'aife'mo, ani hosu aune vekamo alita hafaitapa ataleyo, hu'na hapa pai'nova'monanafa ali'a hafai'a o'atale'nae, huno ha pai'niye. ¹⁹Ha pai'nigeno'ae'mo, ma mopafi'mo hemeni afina'mo mai'naya vayanagi lapakesa afitapa fatago nosaya vayanagi hu'na lapa pai'nae'mo, na magi afina'mo lapakae'e'mo maiguve. Na magi afina'mo lapakae'e'mo mai'ne'na kanamo alige alige hu'na maiguve. Nagaetegamo avalelitapa eyo, huno hapa pai'niye. ²⁰Apakaemo agaetegamo ani mafa'nemo avaleli'a ne'ageno'ae'mo hosu aune vekamo'a Yesu'mo ageteno'ae'mo malage huno alino ago'ya faino atale'nigeno hafosamo'a apamagi'nige'apae'mo nehaya agufa kava huteno mopafi'mo asagauno aiteni heleve heleve nehigeno avayafati'mo avenatu'na'mo hu'niye. ²¹Yesu'a ani mafa'nemo afo'amofe'mo, haiya afinateti'mo ani kava'mo hu'niye, huno afe'ge'nigeno'ae'mo, aise mafa'nemo mai'niya afinateti'mo ani kava'mo aepa faino haume eno hemenimo nehaye. ²²Agaemo kamiti amagisiyafe'mo muki afina'ae afina'ae'mo amagino atafi'e anipi'e'mo ne'ate. Mago kava'mo lagaetegamo afa'a hisuekae'mo kahau huka lateteka laha mao, huno ha pai'nigeno'ae'mo ²³Yesu'a, kagaemo kagesa afika fatago hisana'mo'mo kanalene. Agesa afino fatago hisiya vekamo'a muki kava'mo afa'a hugiye, huno ha pai'nigeno ²⁴malage huno ani mafa'nemo afo'amo'mo aulagafati'mo aunumo emine'nigeno alopa gefati'mo ge huno'ae'mo, Ala kava nene, huno, Nagesa afi'na fatago hu'nova'monanafa nagesa afi'na fatago osu'novanagi afa'a naha mao, huno ha pai'niye. ²⁵Yesu'a apakeyana asole vaya'mo apakaetegamo nagu nagu hu'a e'nageno apaketenosi hosu aune nefe'mo, agesamo alika akanika ateteka avayamo ge osisiyafe'mo alika akanika ate'nana hosu aune vekamo aipafati'mo emikeka kaune heka uteka halate eka haika aipafi'mo alagi o'maiyo, huno lokiya gemo huno ha pai'niye. ²⁶Huno ha pai'nigeno hosu aune vekamo'a kagegaga huteno ani mafa'nemo alino ago'ya faino atale'nigeno hafosamo'a apamagi'nige'apae'mo nehaya agufa kava huge huge huno mai'nigeno hosu aune vekamo ataleno u'niye. Ani mafa'nemo faligekana huno mai'nige'apae'mo asole vaya'mogi hu'apae'mo ago fali'niye, hu'a hu'naya'monanafa ²⁷Yesu'a ha maeno ayate'mo alino he tino ate'niye. ²⁸Yesu'a atalenuno haino nopi'mo mai'nige'apae'mo ge'amo ne'afiya vaya'ageke'mo mai'ne'apae'mo, na kava hige'tae'mo hosu aune vekamo afa'a alita hafaita o'atale'none, hu'a afe'ge'nageno'ae'mo, ²⁹ne'ya'mo mosi'netapa nunumu nehaya kavatetike'mo ani agufa hosu aune vekamo afa'a alita hafaitapa atalegae, huno hapa pai'niye.

Yesu'a halate mago'e huno, falite'na he tiguve, huno

hapa pai'niya gemae

(Mt 17:22-23; Lu 9:43-45)

^{30,31}Apakaemo ani koteti'mo atale'a Galeliya kotegamo u'a ae'a aga se'a u'nae. Yesu'a ge'amo ne'afiya vaya'age'mo alino apaya male'niya'mofe'mo

mago vaya'mogi Yesu'a eno mai'niye, hu'a hute'a esayafe'mo ohau'niye. Alino apaya maleno'ae'mo, Vemo mafa'nemo avaleli'u'a vaya'ai apayapi'mo amamisage'a kamiti amagigae. Amagisageno faliteno'ae'mo lole'e mago'e afina'mo utesigeno halate he tigiye, huno hapa pai'niye. ³²Apakaemo alino apaya male'niya gemo aepa'amo alagepa hu'a afi'a aeto osu'apae'mo loka hu'a afi gesayafe'mo hu'nayana koli hu'nae.

Ina la'mo hogote vekamo mai'niye, huno hu'niya gemae
(Mt 18:1-5; Lu 9:46-48)

³³Apakaemo Kapeneyamu taonifi'mo u'a ava'yi hute'a nopi'mo hai'a mai'ne'apae'mo Yesu'a ge'amo ne'afiya vaya'aife'mo ina ge huno apafi ge'niye. Kategamo ne'etapae'mo na agufa yane gemo hutetapa ge vai'nae. ³⁴ Kategamo ne'e'apae'mo, lagaepati'mo ina la'mo hogote vekamo mai'niye, hu'a hute'a ge vai'naya gelefe'mo Yesu'a ge huno apafi ge'nige'apae'mo ge'ale'mo ae'a atagaina hu'a ha opai'nae. ³⁵Yesu'a fai mai'nenno tuolofu'a vaya'mo ge'amo ne'afiya vaya'aife'mo ge hu'nige'a e'nageno'ae'mo, lapakaepati'mo mago vekamo'a hogote vekamo maigesuve, huno hu'nisiya vekamo'a hogote vekamo maisiyafe'mo henaga vekagana huno mai'nenno muki vaya'aite'mo kayokayo veka'apimo mai'nenno ali'ya'apimo alino maino, huno hapa pai'niye. ³⁶Hapa paiteno vaya'ai apaulagale'mo mago aise mafa'nemo alino he tino ate'niye. Ate'nenno ani mafa'nemo anu ki'nenno hapa paino'ae'mo, ³⁷Ina lagimo mani agufa mafa'nemo avale'a ali'a falu fala hu'a ne'atesafi ani kava hu'a navale'a ali'a falu fala hu'a ne'natae. Ali'a falu fala hu'a natesaya vaya'mogimo ani kava hu'a alino nate'nige'na emine'nova veka'e'mo avale'a ali'a falu fala hu'a nela'ata'ae, huno hapa pai'niye.

Yesu'a, mago vekamo kametimo o'mai'nisiyana lao vekamo mai'niye,
huno hu'niya gemae
(Lu 9:49-50)

³⁸Yoni'a agaefe'mo, Tisao, huno, age'nonana mago vekamo'a kagikaleti'mo hosu apaune vaya'aina alino hapa faino ne'apatalegeta age'none. Lagaepati vekamo o'mai'niya'mofe'mo ani agufa kava'mo osuka afa'a atalo, huta ha pai'none, huno ha pai'niye. ³⁹Yesu'a, ha'ao, afa'a ato, hutapa osiyo. Mago vekamo'a nagi'nileti'mo no'agaya agufa aune kava'mo nehisiya'mo'mo nagi'nilefe'mo huno faipa huno o'nategaiye. ⁴⁰Mago vekamo'a kame huno nolatesiya'mo'mo lao vekamo mai'niye. ⁴¹Lama gemo lapa nepauve, huno, mago vekamo'mo lapaketenno'ae'mo, Kalaisi vaya'amo mai'nae, huno agesamo afitenno nagi'nilefe'mo kapufi ani'mo hefino lapamisiyana miya'amo aligiye, huno hapa pai'niye.

Hosu kava'mo hisayafe'mo apayate ne'aliya kavafe'mo hu'niya gemae
(Mt 18:6-9; Lu 17:1-2)

⁴²Huno hapa paiteno'ae'mo, Mago vekamo'a ani agufa aise mafa'nemo'mo nagaefe'mo agesa afino fatago nehiya mafa'nemo'a hosu

kava'mo hisiyafe'mo ayate'mo ali'nisiyana lusi hanageke ya'mo aligiye. Aligiya'monanafa hogoteno ayate'mo o'ali'nisige'apae'mo atafau'a alopa yafate'mo nofi aete'a lugo'afi'mo aete'a avaleli u'a solovala anipi'mo yaga au'a atalesageno'ae'mo aise hanageke ya'mo aligiye. ⁴³Inagi lapaya'mo'a hosu kava'mo hisayafe'mo alino he tino nelapatesigetapae'mo hetapa hatagautapa ataleyo. Magoke lapaya'mo hane'nisiyana maige maige hutapa maisaya kotegamo haitapa faletapa maisayana kanale hugiye. Lole lapaya'mo hane'nisiyana alagi yu oseno lege lege huno ne'maiya ata kopi'mo lamitapa maisageno'ae'mo alagi hosugiye. ⁴⁴*Ata kopi'mo muki afina'mo hagifamogi apakufafi'mo ne'nayanageno atamo alagi yu osegaiye.* ⁴⁵Lapaiyamo'mo hosu kava'mo hisayafe'mo alino he tino nelapatesigetapae'mo hetapa hatagautapa ataleyo. Magoke lapaiyamo hane'nisiyana maige maige hutapa maisaya kotegamo haitapa faletapa maisayana kanale hugiya'monanafa lole lapaiyamo hane'nisiyana alagi yu oseno lege lege huno ne'maiya ata kopi'mo lamitapa maisageno'ae'mo alagi hosugiye. ⁴⁶*Ata kopi'mo muki afina'mo hagifamogimo apakufafi'mo ne'nayanageno atamo alagi yu osegaiye.* ⁴⁷Lapaulagamo'mo hosu kava'mo hisayafe'mo alino he tino nelapatesigetapae'mo alita katitapa ataleyo. Magoke lapaulagamo hane'nisiyana maige maige hutapa maisaya kotegamo haitapa faletapa maisayana kanale hugiya'monanafa lole lapaulagamo hane'nisiyana alagi yu oseno lege lege huno ne'maiya ata kopi'mo lamitapa maisageno'ae'mo alagi hosugiye. ⁴⁸*Ata kopi'mo muki afina'mo hagifamogimo apakufafi'mo ne'nayanageno atamo alagi yu osegaiye.* ⁴⁹Ne'yate'mo solemo nefalaya kava huno muki vaya'ai apakufale'mo ata apalegaiye. Ani kava'mo hu'a Gotina ne'amiya yate'mo solemo falegaiye. ⁵⁰Solemo kanale ya'mo hane'niya'monanafa haga nehiya ya'amo hano hisige'apae'mo haiya kava hu'a halate haga nehiya ya'amo ali'a hamale'a atesageno haga hugiye. Lapaipafi'mo solekana huno hane'nisigetapa magoke lapaipa lapakesamo alitetapa alagepa hutapa magokepi lokaetapa maiyo, huno hapa pai'niye.

Yesu'a a'ne'apimo hapa fai'a ne'apatalaya kavafe'mo hu'niya gemae
(Mt 19:1-12; Lu 16:18)

10 ¹Yesu'a ani koteti'mo atalenuno Yutiya kotega Yoneni ani'mo lakaenuno mai'nige'apae'mo asole vaya'mo halate agaetega e'a ali'a anupa hu'a mai'nageno nehiya agufa kava'mo huno alino apaya male'niye. ²Mago Falasi vaya'mogi amalageka hisafe'mo agaetegamo e'apae'mo, ke'aepa gemo'a huno'ae'mo, a'nemo afa'a hapa fai'a atalegae huno hu'nifi osu'niye, hu'a afi ge'nae. ³Yesu'a, Mosese'mo na agufa ke'aepa gemo alino lapami'niye, huno apafi ge'nige'apae'mo, ⁴Mosese'a huno'ae'mo, mago vekamo'mo a'amo hafaino atalegefe'mo huno'ae'mo mago avo'mo kaeno a'amo amitenno ha faino atalegaiye, huno hu'niye,

hu'a ha pai'nageno'ae'mo, ⁵ lapaipamo'mo lokiya vai'niya'mofe'mo Mosese'a ani kava'mo hiyo, huno lapa pai'niye. ⁶ Akeya'vilaga Goti'a muki ya'amo alo hu'niya afina'mo *ve kanomo alo huno ateteno a kanomo alo huno ate'niye*. ⁷ Ani kava'mo hu'niya'mofe'mo *ve kanomo'mo ita'afo'ala'moganimo anataleno a'a'e'mo magokepi lokae'ana maiga'ae*. ⁸ Lole kanola'moganimo magoke anakufamo ali'ana hamalega'ae. Lole kanola'mo o'maiga'afa magoke kanola'mo maiga'ae. ⁹ Goti'a alino lokaeno anate'niya kanolapati'mo mago vaya'mogimo ali'a apa he'a o'anesaya kava'mo hane'niye, huno hapa pai'niye. ¹⁰ Nopi'mo haino mai'nige'apae'mo ge'amo ne'afiya vaya'mogi ani kavafe'mo loka hu'a afi ge'nae. ¹¹ Afi ge'nageno'ae'mo, mago vekamo'mo a'amo hafaino ataleteno alu a kanomo ali'nisiya'mo'mo a'alegamo hosu kava'mo huteno kumai kava'mo hu'niye. ¹² Mago a kanomo'mo anau'amo'mo atalenuno alu vele'mo mai'nisiya'mo'mo kumai kava'mo hu'niye, huno hapa pai'niye.

Yesu'a mafa'ne anaga'ai apakufale'mo aya'mo male'nenno, Goti'a lapa maeno, huno hu'niya gemae
(Mt 19:13-15; Lu 18:15-17)

¹³ Mago vaya'mogimo Yesu'a aise mafa'ne anaga'ai apakufale'mo aya'mo maleno apatesiyafe'mo apavaleli'a Yesutegamo ne'age'apae'mo ge'amo ne'afiya vaya'mogi ge hapau'nae. ¹⁴ Yesu'a ani kava'mo ageteno'ae'mo hosu aipamo kali'nigeno ge'amo ne'afiya vaya'aife'mo, aise mafa'ne'aina apatafautapa o'apatege'a nagaetegamo afa'a o'meyo, hutapa osige'a nagaetegamo afa'a eyo. Ani agufa mafa'nemo Goti'a yagaino ne'apateya kote'mo hane'niya ya'mo apakai'api ya'mo hane'niya'mofe'mae. ¹⁵ Lama gemo lapa nepauve, huno, ina lagimo aise mafa'nemogi Gotitegati'mo ne'aliya agufa kava'mo hu'a o'ali'nisafi Goti'a yagaino ne'apateya kegi'yafi'mo afa'a hai'a ofalegae, huno hapa pai'niye. ¹⁶ Hapa paiteno mafa'nemo apavaleno alino asagauno apanu kitenno aya'mo maleno apateteno'ae'mo, Goti'a lapa maeno, huno hapa pai'niye.

Fe'no'e vekamo ava gemae
(Mt 19:16-30; Lu 18:18-30)

¹⁷ Yesu'a ugefe'mo kate'mo ne'vigeno'ae'mo mago vekamo nagu nagu huno eno ale'ya faino mai'nenno'ae'mo, Alagepa tisao, huno, maige maige hu'na maisuva ya'mo alisuvafe'mo na agufa kava'mo hisuve, huno afi ge'nigeno'ae'mo ¹⁸ Yesu'a, na kava higekae'mo nagaefe'mo alagepa tisao huka hane. Gotike'mo magoke'age'mo alagepa vekamo mai'niye. ¹⁹ Ke'aepa gemo ago afi'nanana *vaya'mo ohapao. Kumai kava'mo osuvo. Kumaya'mo o'aliyo. Aigofe gemo osuvo. Aigofe'mo huteka kumaya'mo o'aliyo. Itaka afokala'mogani anaiyafi'mo maiteka ge'animo afiyo*, huno ha pai'nigeno'ae'mo, ²⁰ Tisao, huno, neya mafa'nemo mai'nova afinateti'mo ani muki hana ke'aepa ge'amo akame hume hume

e'na hemeni'e'mo akame nehuve, huno ha pai'niye. ²¹ Yesu'a ageteno'ae'mo agaefe'mo hau ayamopafi'mo hau'nigeno'ae'mo, magoke kavakamo'mo alagi kanale osu'niye. Muki ke'aepa ge'amo akame huteka uka haika hapaisanafe'mo uka muki kagemi yakamo alinikuka maketi huge'apao miya faitesageka alisana monimo alinikeka kagemi ya'apimo ohane'nisiya vaya'aina apamigeno'ao alopa kagemi yakamo koku'napi'mo haneno. Apamiteka eka nakame huvo, huno ha pai'nigeno ²²afi'niya'monanafa alopa kagemi ya'amo hane'niya'mofe'mo hosu augosa kaliteno aipamo'mo kana hu'nigeno ataleno u'niye.

²³ Yesu'a ge'amo ne'afiya vaya'aina aulu hapaeno apaketen'o'ae'mo, Alopa kagemi ya'apimo ali'nisaya vaya'mogi Goti'a yagaino ne'apateya kote'mo haisayafe'mo lusi kava huno lokiya vai'niye. ²⁴ Ge'amo ne'afiya vaya'mogimo ani gemo afite'apae'mo hapau aite'a atete hu'nae. Hapau ai'naya'monanafa Yesu'a, mafa'ne'nimogitapae, huno, kagemi ya'apie'mo, laha maegaiye, hu'a apakesamo ne'afiya vaya'mogi Goti'a yagaino ne'apateya kote'mo haisayafe'mo lusi kava huno lokiya vai'niye. ²⁵ Kamo afumo'a nekaya kapi'mo haino falesiyafe'mo lokiya vai'niya'monanafa mago kagemi ya'e vekamo'mo Goti'a yagaino ne'apateya kegi'yafi'mo haino falesiyafe'mo mago'e huno lokiya vai'niye, huno hapa pai'nige'apae'mo ²⁶ lusi kava hu'a hapau aite'a apakai'apimo hu'apae'mo, ina lagimo maige maige hu'a maisaya ya'mo aligae, hu'a hute'a ge huge afige hu'a mai'nae. ²⁷ Yesu'a aulu hapaeno apaketen'o'ae'mo, vaya'mogimo ani kava'mo afa'a osugaya'monanafa Goti'a ani kava'mo afa'a hugiye, huno hapa pai'niye.

²⁸ Pita'a Yesufe'mo, Afiyo, huno, muki kagemi yatimo ago ataleta eta kakame huta uteta nehune, huno ha pai'nigeno'ae'mo ^{29,30} lama gemo lapa nepauve, huno, muki vaya'mogimo nagaetefenagi alagepa faigoko gelefenagi hu'a no'apimo atale'nisafi konaga'apimogimo apatale'nisafi apasa'apimogimo apatale'nisafi afo'apimogimo apatale'nisafi ita'apimogimo apatale'nisafi mafa'ne'apimo apatale'nisafi a'apimo apatale'nisafi a'mafa'ne'apimo apatale'nisafi hoy'a'apimo atale'nisafi hu'a atale'nisaya vaya'mogimo hemenimo vani hataleti agufa ya'mo alite'a no'api alige konaga'apimogi alige apasa'apimogi alige ita'apimogi alige mafa'ne'apimogi alige hoy'a'api alige hu'a aligae. Aligaya'monanafa mago vaya'mogi apakaetegamo hosu kava'mo hugaya'monanafa henaga'amo afole aisiya afina'mo alagepa hu'a maige maige hu'a maisaya ya'apimo alite'a maigae. ³¹ Maigaya'monanafa hemenimo asole vaya'mogi hogote vaya'mo ne'maiya vaya'mogimo henaga'amo henaga vaya'mo maisage'a henaga ne'maiya vaya'mogimo hogote vaya'mo maigae.

Yesu'a faliteno he tisiya kavafe'mo halate mago'e huno

hapa pai'niya gemae

(Mt 20:17-19; Lu 18:31-34)

³² Apakaemo Yulusalemu taoni kate'mo ne'u'apae'mo Yesu'a uno hogotetege'apae'mo ge'amo ne'afiya vaya'mo akame hu'a ne'u'apae'mo

apakesa ala'amo afite'a hapau aite'a koli hume hume u'nae. Yesu'a kesi kate'mo apavalelinuno halate mago'e huno agaetegamo afole aisiya kavafe'mo hapa paino'ae'mo, ³³Hemenimo lagaemo Yulusalemu taonifi'mo ne'visunageno'ae'mo mago vekamo'a kutulu ya'mo aliteno Vemo mafa'nemo avaleno mono hu'a ne'apataya vaya'aite'mo yagai'a ne'apataya vaya'e ke'aepa gemo avo'mo kae'a ali'a apaya ne'malaya vaya'e'mo apamisige'apae'mo agoti hu'a atete'a, afa'a faligiye, hu'a hutesage'a Yu nofi vayapati'mo o'mai'naya vaya'ai apayapi'mo avale'a ategae. ³⁴Apamisage'apae'mo hu'a faipa hu'a atege apavenatu'na he'a atege nofi kayoteti'mo amagige hute'a kamiti amagigae. Lole'e mago'e afina'mo utesigeno halate he tigiye, huno hapa pai'niye.

Yemisi'e Yoni'e'mo ala netala'mo maigu'ae, hu'ana hu'na'a gemae
(Mt 20:20-28)

³⁵Yemisi'e Yoni'e'mo Sepeti mafa'nela'moganimo Yesutegamo e'anae'mo, Tisao, hu'ana, kafi gesu'a kava'mo huka la'atesanafeke'mo la'ahau'niye, hu'ana ge hu'ana afi ge'na'ageno'ae'mo, ³⁶na agufa kava'mo hu'na lanatesuve, huno anafi ge'nige'anae'mo, ³⁷ha le konali yakamo aliteka fai mai'nekae'mo yagaika apatesana afina'mo la'agaepati'mo mago vekae'mo, eka lamaga nahaopale'mo fai maiyo, huka ha paiteka mago vekae'mo, eka hoga nahaopale'mo fai maiyo, huka la'aha paiyo, hu'ana ha pai'na'ae. ³⁸Yesu'a, na agufa kavafe'mo afi neko'afi hutana o'afi'na'ae. Nesuva kapufati'mo afa'a nesa'afi hosu yateti'mo ali'a fale'a natesaya ya'mo afa'a aliga'afiye, huno anafi ge'nige'anae'mo, ³⁹he, afa'a neteta'a aligu'ae, hu'ana ha pai'na'ageno'ae'mo he, huno, nesuva kapufati'mo netetana hosu yateti'mo ali'a fale'a natesaya ya'mo afa'a aliga'ae. ⁴⁰Aliga'a'monanafa lamaga nahaopale'mo fai maige hoga nahaopale'mo fai maige hutana fai mai'ao hu'na hisuva gemo nagai'ni ya'mo ohane'niye. Gotike'mo ago alo huno anate'niya vekalake'mo alino anamigiye, huno hana pai'niye.

⁴¹Naya lole'a vaya'mo ge'amo ne'afiya vaya'mogi ani gemo afite'apae'mo Yemisi'e Yoni'efe'mo apaipa le'a anate'nae. ⁴²Yesu'a ge hu'nige'a e'nageno'ae'mo, Yu nofi vayapati o'mai'naya vaya'aite'mo yagai'a ne'apateya vaya'mogi ali'a afepi apatete'a yagai'a ne'apatae. Ani kava'mo hu'a ala apaki vaya'mogi ina kava hiyo ma kava hiyo, hu'a nehae. ⁴³Nehaya'monanafa lapakaemo ani kava'mo osisaya kava'mo hane'niye. Lapakaepati'mo mago vekamo'a, ala nagi vekamo maigesuve, huno hu'nisiyana kayokayo vekatapimo maino. ⁴⁴Lapakaepati'mo mago vekamo'a, hogote vekamo maigesuve, huno hu'nisiyana kalavusi ali'ya'mo aliteno kayokayo vekatapimo maino. ⁴⁵Ani kavatefe'mo Vemo mafa'nemo agaete'mo kayokayo hu'a atesaya agufa vekamo maisiyafe'mo emi'no'me'nifa kayokayo veka'apimo mai'nenno agufa'aleti'mo miya faino hatu maeno apatesiyafe'mo emine'niye, huno hapa pai'niye.

**Yesu'a mago aulagamo ali hu'niya vekamo alino
ayakeno ate'niya gemae
(Mt 20:29-34; Lu 18:35-43)**

⁴⁶Apakaemo Yeliko taonifi'mo u'a ava'yi hu'nae. Yesu ge'amo ne'afiya vaya'e asole vaya'e'mo Yeliko taonimo atale'a akame hu'a u'nageno Matimeyasi'a Timiyasi mafa'nemo aulaga ali hu'niya vekamo'a ka agi'nale'mo fai mai'nenon monie'mo aukaya huno mai'niye. ^{47,48}Mago vaya'mogi hu'apae'mo, Yesu'a Nasalasa vekamo ne'e, hu'a hu'naya gemo afitenoe'ae'mo aepa faino ge huno'ae'mo, Yesuo, huno, Nevini aginagomo kahau huka nato, huno ha pai'nige'apae'mo asole vaya'mogi hu'apae'mo, ge osuka afa'a maiyo, hu'a ge hau'naya'monanafa magoe' magoe' huno ge huno'ae'mo, Nevini aginagomo, huno, kahau huka nato, huno ge huge huge huno mai'niye. ⁴⁹Yesu'a eno he tino mai'nenon'ae'mo, ani vekae'mo ge higeno'ao nagaetegamo eno, huno hapa pai'nige'a aulagamo ali hu'niya vekae'mo, kaipamo lokiya vaika kato. Kagaefe'mo ge nehigi he tiyo, hu'a ha pai'nageno ⁵⁰alonoku'mo alino asagino ataleteno malage huno aeno hailo huno he tino Yesutegamo e'niye. ⁵¹Yesu'a, na kava hu'na katesuve, huno afi ge'nigeno aulagamo ali hu'niya vekamo'a, Tisao, huno, naulagamo alika ayakeka nato, huno ha pai'nigeno'ae'mo, ⁵²kagesa afika fatago hu'nana kavakamo'a alino alagepa huno kate'nigi afa'a uvo, huno ha pai'nigeno malage huno aulagamo ageno ayaketeno kate'mo akame huno u'niye.

**Yesu'a Yulusalemu taonifi'mo kini vekagana huno hai'niya gemae
(Mt 21:1-11, 18-19; Lu 19:28-40; Yo 12:12-19)**

11 ¹Apakaemo Yulusalemu taoni haopale'mo Metapesi taoni'e Metani taoni'e'mo Alifi'aepa avele'mo hane'niya taonifi'mo u'a ava'yi hute'apae'mo agaemo lele vekala'mo ge'amo ne'afi'a vekala'mo alino anate'niye. ²Alino anateteno hana paino'ae'mo, nagae naulagale'mo hane'niya taonifi'mo utana hai'ao. Uta haitana ava'yi hutetanae'mo agesa'ana mago aikeli noki afumo nofi ae'a ate'nisaya noki afule'mo mago vaya'mo fai'a o'mai'naya noki afumo mai'nisigetana agega'ae. Agetetanae'mo hatu maetana avalelitana e'ao. ³Mago vaya'mogi, na kava hisa'afe'mo hatu ne'ma'ae, hu'a lanafi gesagetanae'mo, Ala kava ne'mo'a ali'ya'amo hane'nigeta'aene, hutana hisa'ageno'ae'mo malage huno alino atesigeno manile'mo egaiye, huno hana pai'niye. ⁴Anakaemo u'ana aga'ana ani aikeli noki afumo no kipate'mo nofi ae'a ate'nageno kate'mo mai'nige'ana agete'ana hatu mae'na'ae. ⁵Hatu ne'ma'age'apae'mo mago anile'mo he ti'a mai'naya vaya'mogi, na kava hisa'afe'mo hatu ne'ma'ae, hu'a anafi ge'na'age'anae'mo ⁶Yesu'a hana pai'niya gemo hapa pai'na'age'a anatale'na'age'ana avaleli'ana u'na'ae. ⁷Yesutegamo avaleli e'anae'mo

yatala kukena'animo alapa'age kukenamo asagi'ana agotofule'mo male'na'ageno Yesu'a haino fai mai'niye. ⁸ Asole vaya'mogimo ani kava hu'a yatala kukena'apimo alapa'age kukenamo asagi'a kapi'mo yakaige mago vaya'amogi u'a yahaofilaga yosa akopamo he'a yage'a kapi'mo yakaige hu'a maleme maleme u'nae. ⁹ U'a hogote'naya vaya'mogi'e henaga akame hu'a e'naya vaya'mogi'e'mo alopa gefati'mo ge hu'apae'mo, amuse higetao.

Ala kava ne'mo agi'alefe'mo ne'eyanagi ha maeno, hu'a hute'a, ¹⁰ Laginago netimo Nevini'a kini vekamo mai'nenno yagaino ne'apateya kava huno Ala kava ne'mo agi'aleti'mo yagaino apatesiya vekamo Goti'a ha maeno. Gotifeke'mo amuse higetao, hu'a hute'a hume hume u'nae.

¹¹ Agaemo noki afule'mo maiteno Yulusalemu taonifi'mo haino ava'yi huteno Yu vaya'ai alopa mono nopi'mo haino muki yakofe'mo aulu haeno ageno mai'niye. Mai'niya'monanafa ago hani hugefe'mo hu'nige'apae'mo agae'e ge'amo ne'afiya vaya'e'mo Metani taonifi'mo ai'a atagine'a e'nae.

Yesu'a fiki yosae'mo ge hu'nigeno falu te'niya gemae

^{12,13} Ega'amo Metani taonifati'mo ne'e'apae'mo Yesu'a aga te'nigeno ageyana muga afagi'ale'mo fiki yosamo hane'nigeno ageyana asole haitamo male'nigeno ageteno alagamo ae'negaiye, huno huteno u'niye. Uno ageyana haita'age hane'nigeno age'niye. Fiki yosamo'mo alaga ne'aeya afina'mo ohane'niya'mofe'mo alagamo o'ae'niye. ¹⁴ Yesu'a huno'ae'mo, halate alagamo o'aesanage'a vaya'mogi e'a lagi'a o'negae, huno hu'nige'a ge'amo ne'afiya vaya'mogi afi'nae.

Yesu'a alopa mono nopati'mo alino hapa faino apatale'niya gemae

(Mt 21:12-17; Lu 19:45-48; Yo 2:13-22)

¹⁵ Apakaemo Yulusalemu taonifi'mo u'a ava'yi hute'a Yesu'a Yu vaya'ai alopa mono nopi'mo haino ageyana ani mono nopi'mo maketi ne'malaya vaya'mo mai'nageno apaketeno alino hapa faino apatale'niye. Agaemo alu vaya'ai monimo alite'a Yu vaya'ai monimo ne'apamiya vaya'ai hi'yalamu'apimo alino ago'ya faino atalege namamo miya nefaiya vaya'ai sia'apimo alino ago'ya faino atalege hu'niye. ¹⁶ Agaemo, mono no kate'mo kagemi yatapimo ali'nitutetapa osiyo, huno hapa paiteno ka akanino apate'niye. ¹⁷ Alino apaya maleno'ae'mo, *vaya'mogimo no'nie'mo hu'apae'mo, nunumu nehaya none, hu'a hugae*, huno avo'mo kae o'male'nifiye. Lapakaemo *kumaya vaya'mo e'a fala ki'a ne'maiya nokana* hutapa alita hamaletapa ate'nae, huno hapa pai'niye.

¹⁸ Mono hu'a ne'apataya vaya'aite'mo yagail'a ne'apataya vaya'e ke'aepa gemo avo'mo kae'a ali'a apaya ne'malaya vaya'mogi'e'mo ani kavafe'mo ava gemo afite'apae'mo amagisaya kafe'mo kahauya hu'a mai'nae. Muki vaya'mogimo ge'amo afite'apae'mo hapau ai'naya'mofe'mo agaefe'mo koli hu'nae. ¹⁹ Hani hugefe'mo hu'nigeno'ae'mo taonifi'mo ataleno u'niye.

Falu te'niya yosamo ava gemae
(Mt 21:20-22)

²⁰Kotilamiyapi'mo kate'mo ne'u'apae'mo ageyana fiki yosamo'mo muki haita'agi akopa'agi hafu'ya'agi huno alagi falu te'nige'a age'nae. ²¹Pita'a Yesu'mo hu'niya kavafe'mo agesamo afino ho hu'niye. Huteno'ae'mo, Tisao, huno, ago. Ge hau'nana fiki yosamo ago falu te'niye, huno ha pai'nigeno ²²Yesu'a, Gotife'mo lapakesa afitapa fatago hiyo. ²³Lama gemo lapa nepauve, huno, mago vekamo'a lole agesamo o'afi'nenno, hisuva gemo alagi afole aigiye, huno agesa afino fatago hu'nenno'ae'mo mani avee'mo, nokamo atalekuka solovala anipi'mo asagauka aiyo, huno hu'nisiya'mo'mo huvo huno hisiya kava'mo afa'a hugiye. ²⁴Ani kava'mo hane'niya'mofe'mo lapa nepauve, huno, lapakaemo na agufa ya'mo aliguve, hutapa nunumu hutapa afi nekesafi lapakesa afitapa fatago hu'netapa hiyo afa'a aligayanagi. ²⁵Nunumu hugefe'mo he titapa mai'netapae'mo hosu lapaipamo kalitapa ate'nisaya vekamo hosu kava'amo alitapa atalegeno'ao koku'napi Afotapimo'a ani kava huno hosu kavatapimo alino ataleno. ²⁶Hosu kava'amo alitapa o'atalesayana koku'napi Afotapimo'a ani kava huno hosu kavatapimo afa'a alino o'atalegaiye, huno hapa pai'niye.

Yesufe'mo, ina la'mo ani agufa ali'ya'mo aliyo, huno kaha pai'niye,
hu'a afi ge'naya gemae
(Mt 21:23-27; Lu 20:1-8)

²⁷Apakaemo halate Yulusalemu taonifi'mo e'apae'mo agaemo alopa mono no kumate'mo umenitata nehige'apae'mo mono hu'a ne'apataya vaya'aite'mo yagai'a ne'apataya vayanagi ke'aepa gemo avo'mo kae'a ali'a apaya ne'malaya vayanagi vayatama vayanagi hu'a agaetegamo e'nae. ²⁸E'a ha pai'apae'mo, haiya agufa alagena ya'mo yagaika ne'apatana alagena ya'mo ali'nekae'mo ani agufa kava'mo nehane. Ina la'mo ani agufa kava'mo huvo, huno kaha pai'niye, hu'a afi ge'nae. ²⁹Afi ge'nageno'ae'mo Yesu'a, nagae'e'mo mago gemo loka hu'na lapafi gegauve. Ge'nile'mo aetapa atagaina hutapa naha paisage'nae'mo haiya agufa alagena ya'mo yagai'na ne'apatova alagena ya'mo ali'nofi, hu'na lapa paiguve. ³⁰Goti'a Yoni'mo ani'mo faleno apatesiyafe'mo lekana paino ate'nifi vaya'mogimo lekana pai'a ate'nae, huno apafi ge'nige'apae'mo ³¹apakai'apimo ge huge afige hu'apae'mo, Lagaemo hutae'mo Goti'a lekana paino ate'niye, huta hisunana agaemo huno'ae'mo, na kava higetapae'mo Yoni ge'ae'mo lama gemo nehiye, hutapa osu'nae, huno lafi gegaiye. ³²Hugiya'mofe'mo lagaemo hutae'mo, vaya'mogi lekana pai'a ate'nae, huta hisunana ani gemo'e'mo hosugiye. Apakaemo muki vaya'aife'mo koli hu'naya'mofe'mo ani gemo osu'nae. Muki vaya'mogimo Yonife'mo alagepa vekamo

Gotitegati gemo alinineno aeno hakalo huno hapa nepaiya vekamo mai'niye, hu'a apakesamo afi'nae. ³³Afi'naya'mofe'mo Yesufe'mo, o'afi'none, hu'a ha pai'nageno'ae'mo, ani kava'mo hu'na haiya agufa alagena ya'mo yagai'na ne'apatova alagena ya'mo ali'ne'na ani kava'mo nehufi, hu'na lapa opaiguve, huno hapa pai'niye.

Nofi hoyae'mo aeno kalafefa gemo huno hu'niya gemae
(Mt 21:33-46; Lu 20:9-19)

12 ¹Yesu'a aepa faino aeno kalafefa gemo huno hapa paino'ae'mo, mago vekamo'a nofi hoyamo vai maleteno kegi'ya huno ku ai maleteno nofi alagamo ae'a lata paisageno ani'amo lamisiya kelimo kafi maleteno yatala no'mo ani hoyale'mo yagai'a maisaya vaya'ai no'mo ki male'niye. Agaemo mago vaya'mogi yagai'a ate'nisageno nofi alagamo afu lesige'apae'mo apakaemo ani nofi alagamo lagisayafe'mo apavaleno apateteno afa'gi kotegamo u'niye. ²Nofi alagamo ago afu le'nigeno'ae'mo agaemo mago nofi alagamo alisiyafe'mo ali'ya'ale'mo mai'niya vekamo alino ate'nigeno hoya'ale'mo yagai'a ate'naya vaya'aitegamo u'niye. ³U'nige'a hoya'ale'mo yagai'a ate'naya vaya'mogimo atafau'a amagite'apae'mo, okamigunanagi afa'a ataleka uvo, hu'a ha pai'nageno ataleno u'niye. ⁴Hoya aepa vekamo'a halate mago alu vekamo aliya'ale'mo mai'niya vekamo alino ategeno ne'vige'apae'mo yafa kayoteti'mo ali'a anu'mo ai'a apalo ati'a amagite'a ali'a hosu hu'a ate'nae. ⁵Agaemo mago alu vekamo ali'ya'ale'mo mai'niya vekamo alino ategeno uno ava'yi nehige'apae'mo kamiti amagi'nae. Ani kava huno mago'e vaya'mo alino apate'nige'a u'nage'apae'mo mago vaya'amo aise'amo apamagige mago vaya'amo kamiti apamagige hu'a apamagi'nae. ⁶Magoke mafa'ne'ae'mo hau ayamopafi'mo hau'niya mafa'ne'age'mo mai'nigeno henaga'amo, mani mafa'ne'nimo ge'amo afa'a afigae, huno huteno alino ate'nigeno u'niye. ⁷U'nige'apae'mo hoya'ale'mo yagai'a ate'naya vaya'mogimo agete'apae'mo, hoya aepa vekamo mafa'ne'amo'mo muki afo'amo ya'mo aligiye. Amagigetao agaemo alisiya hoyamo lagaemo aligunanagi, hu'a hute'a ⁸atafau'a kamiti amagite'a kefa'amo alini'u'a kegi'ya malaga yaga au'a atale'nae. ⁹Inagi hoya aepa vekamo'a na agufa kava hugiye. Eno hoya'ale'mo yagai'a ate'naya vaya'aina kamiti apamagitenno alu vaya'mogi hoya'ale'mo yagai'a atesayafe'mo apavaleno apategaiye. ¹⁰Lapakaemo mago gemo Goti'a avo'mo kae male'niya gemo lekana opai'nafiye. Ani gemo'a huno'ae'mo,

Yafateti'mo no'mo nekiya vaya'mogimo mago yafafe'mo hu'apae'mo, afa yafane, hu'a hu'naya yafa'mo'a mago hogote yafa'mo afole ai'niye. ¹¹Ala kava ne'mo'a ani kava'mo alino afole aino ate'nigeta ageta lahou aitetae'mo, vae, huta, alagepa kava'mo nehiye, huta nehune,

huno hu'niye, huno Yesu'a hapa pai'niye. ¹²Hapa pai'nige'a afite'apae'mo, ani aeno kalafefa gemo lagaefeke'mo hu'niye, hu'a hute'a atafau'a kalavusi hu'a atesayafe'mo hu'naya'monanafa muki vaya'aife'mo koli hu'naya'mofe'mo atale'a u'nae.

Takesi hisaya kavafe'mo ge hu'a afi ge'naya gemae

(Mt 22:15-22; Lu 20:20-26)

¹³Apakaemo atale'a ute'a Falasi vaya'e Heloti'a akame nehaya vaya'efe'mo hapa pai'apae'mo, ane'ai hanagi male'nageno malage huno ne'atafaiya kava hutapa yagai'netapa ge'aleti'mo atafaiyo, hu'a hapa paite'a ali'a apate'nage'a agaetegamo u'nae. ¹⁴E'apae'mo, Tisao, hu'a, ago kage'nonana lama gemo nehana vekamo mai'neka muki vaya'aife'mo koli osuka muki vaya'aitegamo magoke aiyaya kava'mo nehane. Goti ge'amo akame hisaya kavatefe'mo lama gekaleti'mo alika apaya ne'malane. Lagaemo takesi monimo Sisa'a yagaino ne'apateya gamani vekamo amisunafe'mo ke'aepa gemo'a huno'ae'mo, amiyo, huno hu'nifi osu'niye. ¹⁵Takesi monimo apamisupi o'apamisune hu'a afi ge'nageno'ae'mo Yesu'a apakesamo afite'a apaipafati'mo ge osu'nafa ae'a ati kae'a hu'naya ge'apimo apaketen'o'ae'mo, na kava higetapae'mo namalageka hutapa nafi nekae. Alaga monimo alinitetapa nave liyo, huno hapa pai'niye. ¹⁶Apakaemo alini e'a ami'nageno'ae'mo, mani alaga monile'mo ina la augosa'e agi'e'mo avo'mo kae male'naya monimo hane'niye, huno apafi ge'nige'apae'mo, Sisa augosa'e agi'e'mo hane'niye, hu'a ha pai'nageno'ae'mo, ¹⁷Sisa ya'amo Sisana amitetapa Goti ya'amo Gotina amiyo, huno hapa pai'nige'apae'mo hapau ai'nae.

Fali'naya vaya'mo he tisaya kavafe'mo loka hu'a afi ge'naya gemae

(Mt 22:23-33; Lu 20:27-40)

¹⁸Satiyusi mono vaya'mogimo fali'naya vaya'aife'mo he otigae, hu'a apakesamo ne'afiya vaya'mo agaetegamo e'nae. Apakaemo loka hu'a ate'apae'mo, ¹⁹Tisao, hu'a, Moses'e'a avo'mo kae male'niya gemo'a huno'ae'mo, mago vekamo'mo a'mo aliteno mafa'nemo alino o'ateno falitesigeno'ae'mo konaga'amo'mo kogu'amo aliteno fali'niya vekamo aimu'yale'mo mafa'nemo alino apateno, huno hu'niye. ²⁰Mago afina'mo seveni'a konagamo mai'nae. Nepu'apimo'mo mafa'nemo alino o'ateno ataleno falitegeno ²¹agana'amo'mo kogu a'mo ali'niye. Napa tu konaga'amo'mo ani kava huno falitegeno napa tali konaga'amo'mo ani kava huno falitege'a ²²ani kava'mo hu'a alite'a falite falite hu'a seveni'a konagamo ago fali'a hano hu'nae. Falitageno'ae'mo a kanomo henaga'amo fali'niye. ²³Fali'a u'nayategati'mo he tisageno'ae'mo haiya vekale'mo ani a kanomo maigiye. Seveni'a konagamogimo ali'naya'mofe'mae, hu'a afi ge'nae. ²⁴Afi ge'nageno'ae'mo, lapakaemo Goti mukufi gemo o'afige

Goti'a ayamufa'age vekamo mai'niye hutapa o'afige hu'naya'mofe'mo ika ika lapakesamo ne'afiye. ²⁵Fali'a u'nayategati'mo he ti'apae'mo a'mo o'alige vele o'maige hugaya'monanafa koku'napi enisole vayakana hu'a maigae. ²⁶Fali'a u'nayategati'mo he tisaya kavafe'mo Mosesela mukufi'mo avo'mo kae male'niya gemo aise yosafati'mo ata nelegeno Goti'a Mosesefe'mo ha pai'niya gemo lekana paitapa o'afi'nafiye. Goti'a huno'ae'mo, *Emalehamu Goti'amo'na maige Aisiki Goti'amo'namo maige Yekopu Goti'amo'namo maige hu'na Goti'apimo'namo mai'nove, huno hu'niye.* ²⁷Agaemo alagi fali'naya vaya'ai Goti'apimo'a o'mai'nifa afa'a ne'maiya vaya'ai Goti'apimo'a mai'niye. Alagi ika ika lapakesamo afi'netapae'mo ani gemo nehae, huno hapa pai'niye.

Hogote ke'aepa ge'ae'mo hu'niya gemae
(Mt 22:34-40; Lu 10:25-28)

²⁸Mago vekamo ke'aepa gemo afiteni alino apaya ne'maleya vekamo'a eno ge huge afige hu'a mai'naya gemo afi'niyana Yesu'a ge'apile'mo alagepa huno aeno atagaina huno hapa pai'niye, huno agesa afiteni'ae'mo, ke'aepa gefati'mo hogote ke'aepa gemo haiya gemo hane'niye, huno afi ge'niye. ²⁹Afi ge'nigeno'ae'mo, hogote ke'aepa gemo hane'niyana,

Isaleli vaya'mogitapamo afiyo, huno, Ala kava ne'mo Gotitimo'a mai'niye. Ala kava ne'mo magoke vekamo mai'niye. ³⁰Lapakaemo Ala kava ne'mo Gotitapimofe'mo muki lapaipafatinagi muki lapaune lapamepatinagi muki lapakesamo ne'afiya yatapifatinagi muki lapayamufafatinagi huno lapaino.

Ani gemo hogote ke'aepa gemo hane'niye, huno huteno, ³¹Lole ke'aepa gela'mo'a huno'ae'mo,

lapakaitapie'mo lapau lapayamopafi'mo nelapaiya kava huno lapaopale'mo ne'maiya vaya'aife'mo lapaino,

huno hu'niye. Huno huteno, mani lole ke'aepa gela'mo'a muki ke'aepa ge'amo ago aeno aga se'niye, huno ha pai'niye. ³²Ha pai'nigeno'ae'mo ke'aepa gemo avo'mo kaeno alino apaya ne'maleya vekamo'a huno'ae'mo, Tisao, huno, alagepa gemo hane. Goti'a magoke vekamo mai'niya'mofe'mo alu goti'a o'mai'nifa agai'ageke'mo mai'niye, huka hana gemo lama gemo hane. ³³Agaefe'mo muki laipafatinagi muki lagesamo ne'afuna yatifatinagi muki laune lamepatinagi muki layamufafatinagi huno lahau'nisigeta lagaitie'mo lahau layamopafi'mo nelahaiya kava huta lahaopale'mo ne'maiya vaya'aife'mo lahaisiya kava'mo'a afumo amagita atafi'mo kaeta Goti'mo ofalinimo amige alu ofalinimo amige hisuna kava'mo ago aeno aga se'niye, huno hu'niye. ³⁴Yesu'a ani hu'niya gemo afiteni'ae'mo alagepa huno afi'niye, huno agesamo afiteni'ae'mo, kagaemo Goti'a yagaino ne'apateya kegilyafi'mo uka haika falesanafe'mo

eka hogo hu'nane, huno ha pai'niye. Yesu'a ani gemo huno ha pai'nige'apae'mo koli hute'a mago'e gemo hu'a loka hu'a afi oke'nae.

Kalaisi nefe'mo ge huno apafi ge'niya gemae
(Mt 22:41-46; Lu 20:41-44)

³⁵ Yesu'a Yu vaya'ai alopa mono nopi'mo haino alino apaya ne'maleno'ae'mo, na kava hige'apae'mo ke'aepa gemo ali'a apaya ne'malaya vaya'mogi hu'apae'mo, Kalaisi ne'mo Nevini akamelegati aginago'amo mai'niye, hu'a nehae. ³⁶ Aote Auneme'amo'mo Nevini'mo mago gemo alino ami'nigeno huno'ae'mo,

Ala kava ne'mo Ala kava ne'nie'mo huno'ae'mo, lamaga nahaopale'mo faika maima maima ne'uge'nao kamekamo apamagisuge'a kaiya afe'alumelaga maigayanagi, huno hu'niye. ³⁷ Nevini'a Kalaisi nefe'mo Ala kava ne'nie, huno hu'niya'mofe'mo haiya kava huno Kalaisi ne'mo'a Nevini akamelegati aginago'amo mai'niye, huno apafi ge'niye. Muki asole vaya'mogimo ani gemo afite'apae'mo amuse hu'nae. ³⁸ Alino apaya maleteno'ae'mo, ke'aepa gemo ali'a apaya ne'malaya vaya'aife'mo etetapiye. Apakaemo hapau'nige'a yatala kukenamo ali'a vai'a alite'a umenitata nehae. Maketi kumategamo mai'naya vaya'mogimo ge apamamaete'a amuse hu'a ne'apataya kavafe'mo nehapaiye. ³⁹ Hapau'nige'a alu mono nopi'e alu mono nopi'e'mo hai'a anaga maige yagita nehayategamo ala apaki vaya'mo ne'maiya siate'mo hai'a maige nehae. ⁴⁰ Apakaemo kogu a'ne'ai kagemi ya'apimo kumaya'mo alite'apae'mo ae'a ati kaesayafe'mo yatala nunumu nehae, huno hapa pai'niye.

Kogu a kanomo'a ofalini monimo male'niya gemae
(Lu 21:1-4)

⁴¹ Yesu'a Yu vaya'ai alopa mono nopi'mo haino ofalini monimo ne'malaya kesimo haopale'mo fai mai'nige'apae'mo asole vaya'mogimo ofalini monimo male'nageno apake'niye. ⁴² Mago kogu a kanomo kagemi ya'amo ohane'niya kogu a kanomo'a eno lole asagalifa monila'mo male'nigeno age'niye. ⁴³ Agaemo ge'amo ne'afiya vaya'aife'mo ge hu'nige'a e'nageno'ae'mo, lama gemo lapa nepauve, huno, mani kogu a kanomo kagemi ya'amo ohane'niya kogu a kanomo'a male'niya monimo'mo muki vaya'amogimo male'naya monimo ago aeno aga se'niye. ⁴⁴ Muki vaya'amogimo alopa moni'apimo male'naya yapati'mo alini e'a male'naya'monanafa agaemo moni'amo o'male'niya yapati'mo ne'ya'amo miya faino nesiya monimo ataleno hano hu'niye, huno hapa pai'niye.

Yesu'a ma mopamo hano hisiya afinafe'mo ava gemo hu'niya gemae
(Mt 24:1-2; Lu 21:5-6)

13 ¹ Yesu'a Yu vaya'ai alopa mono nopati'mo nelamigeno'ae'mo mago vekamo ge'amo ne'afiya vekamo'a, Tisao, huno, ago kanale

yafateti'mo alagepa noko'age'mo ki male'naya noko'mo hane'niye, huno ha paiteno amuse hu'niye. ² Yesu'a, alagepa noko'age'mo age'napiye. Magoke yafate'mo akalo akalo huno ohanegaifa he'a halagape vaite'a muki yafa'amo ali'a ai'a atagu fae'a aote aote hu'a atalegae, huno ha pai'niye. ³ Agaemo Alifi'aepa avefi'mo haino fai mai'nigeno'ae'mo Yu vaya'ai alopamo no'mo aulagale'mo hane'nige'apae'mo Pita'agi Yemisi'agi Yoni'agi E'nalu'agi hu'a apakai'apige'mo mai'ne'apae'mo, ⁴ hainu afina'mo afole aigiye. Afi'nisunageno afole aisi yafe'mo laha paiyo, hu'a afi ge'nae. ⁵ Yesu'a aepa faino hapa paino'ae'mo, humi olapatesayafe'mo ehetafiye, huno, alagepa hutapa yagaiyo. ⁶ Asole vaya'mogimo nagi'nimo aete'apae'mo, nagaemo Kalaisi'namo ne'ove, hu'a hute'a asole vaya'aina humi apategae. ⁷ Lapaopale'mo kame hisaya kavafe'mo ava gemo hisagetapa afige afagitega kame hisaya kavafe'mo ava gemo hisagetapa afige hutetapae'mo lapau aitetapa koli osiyo. Ani kava'mo afole aigiya'monanafa hano hisiya afina'mo henaga'age'mo afole aigiye. ⁸ Mago nofi vaya'mogi u'a alu nofi vaya'e'mo kame hugae. Mago gamani vaya'mogi u'a alu gamani vaya'e'mo kame hugae. Imima'mo aote aote huno alige kafu hu kava'mo afole aige hanageke kava'mo afole aige huno afole aigiya'monanafa apakafu nekiya kava'mo saufamogeno afole aigiye. ⁹ Mago vaya'mogimo lapatafau'a kanisole vaya'ai agotile'mo lapavaleli'a uge alu mono nopi alu mono nopi'mo lapamagige hute'a gamani vaya'aite'mo yagai'a ne'apataya vaya'aitega'e yagai'a ne'apataya kini vaya'ai apaulagale'e'mo nagi'nilefe'mo utapa he ti netapa lama gemo hugae. ¹⁰ Hogote'a muki alu nofi vaya alu nofi vaya'aife'mo nava gemo hu'a alagepa faigoko ge'nimo ae'a hakalo hu'a hapa pai'a hano hugae. ¹¹ Lapatafau'a agoti hu'a lapatesayafe'mo lapavaleli'u'a apamisagetapae'mo hogotetapa hutapae'mo, na agufa gemo hugupi, hutapa osutapa ani afina'mo Goti'a alino lapamisiya gemo hapa paiyo. Lapakaemo hapa opaigafa Aote Auneme'amo'a hapa paigiye. ¹² Mago vaya'mogi konaga'apimo apamagisage'a falisayafe'mo apavale'a apamige mafa'ne'apimo apavale'a apamige ita'api afo'apimogimo apavale'a apamige hugae. ¹³ Muki vaya'mogimo nagi'nilefe'mo apaini hu'a lapategaya'monanafa o'atale'a atafau'a alagi hu'a maima maima ne'visaya vaya'aina hano hisiya afina'mo apakufamo alino katino apateteno hapau vaigiye. ¹⁴ Lekana nepaiya vaya'mogitapamo mani gemo aepa'amo alagepa hutapa afiyo. Lapakaemo agegayana *lusi hosu ya'mo'a alino hano huno atesiya agufa ya'mo hane'nisigetapa* agegae. Neniyo'a Gotitegati gemo alinineno aeno hakalo huno hapa nepaiya vekamo'a ani yafe'mo avo'mo kae male'niye. Ani agufa hosu ya'mo ohane'nisiya nopi'mo hane'nisigetapa agetetapae'mo ataletapa lapaune heyoy. Yutiya kotega mai'nisaya vaya'mogi avelegamo apaune hetale'a hai'a maiyo. ¹⁵ Inagi nokato'mule mai'nisaya vaya'mogimo kagemi ya'apimo alini'a visayafe'mo lami'a no'apifi'mo ohaiyo. ¹⁶ Hoya'apifilaga mai'nisaya vaya'mogi saketi'apimo

ali'a vaisayafe'mo halate ai'a atagi ne'a o'meyo. ¹⁷Vaehae, hu'na, ani afina'mo apaipagu'e mai'nisaya a'ne'e mafa'nemo nu ne'apamisaya a'ne'efe'mo nahau huve. ¹⁸Yasi alisiya afina'mo lapaune osesayafe'mo nunumu hiyo. ¹⁹Ani afina'mo afole aisiya hanageke ya'mo'a hogoteno afole ai'niya hanageke ya'mo Goti'a ma mopamo alo hu'niya afinateti'mo afole aime aime e'niya hanageke yanagi muki afole aisiya hanageke yanagi huno ago aeno aga seno afole aigiye. ²⁰Ala kava ne'mo'a ani agufa hanageke afina'mo alino hogo huno o'ate'niyesinana muki vaya'amo ago fali'naesina'monanafa lekana paino apate'niya vaya'aitefe'mo ani hanageke afina'mo ali'na hogo hu'na ategauve, huno agesamo afi'niye. ²¹Mago vaya'mogi hu'apae'mo, Ageyo, hu'a, Kalaisi'a manile mai'niye, hu'a huge, ageyo, hu'a, mugalega mai'niye, hu'a huge hisagetapae'mo, lama gemo nehae, hutapa lapakesamo o'afiyo. ²²Mago vaya'mogi, Kalaisi'na mai'nove, hu'a huge Gotitegati gemo alini'ne'na ae'na hakalo hu'na hapa nepauva vekamo mai'nove, hu'a huge hute'a no'agaya apaune kava'mo hute'a ago lekana paino apate'niya vaya'aife'mo humi apatesayafe'mo ani kava'mo hugaya'monanafa afa'a humi o'apategae. ²³Nagaemo muki afole aisiya kavafe'mo ago lapa pai'novanagi alagepa hutapa yagaiyo.

Vemo mafa'nemo henaga'amo eminesiya gemae

(Mt 24:29-31; Lu 21:25-28)

²⁴Ani afina'mo lusi hanageke ya'mo afole aitesigeno'ae'mo yegemo olesigeno kaimo olegaiye. ²⁵Muki kanefi'amo koku'napati'mo aino atafaino asagauno aigiye. Koku'napi hane'niya ya'amo'mo atete nehisigeno'ae'mo alino aino atagu faeno atalegaiye. ²⁶Ne'atalesige'apae'mo agesayana Vemo mafa'nemo'a ha le konali ya'amo aliteno himamu'a'e'mo hiyate'mo eminesige'a agegae. ²⁷Agaemo enisole vaya'amo alino apatesige'a ma mopamo lole'e lole'e atupale'e koku'na atupale'e'mo u'e'a hu'a lekana paino apate'niya vaya'amo apavaleli e'a ali'a anupa hu'a apategae.

²⁸Fiki yosae'mo ae'na kalafefa gemo huguvanagi afitetapae'mo agetapa aeto hiyo. Fiki yosamo'a ausisi aeteno anupa ne'malegetapae'mo saufa kafugamo lamigefe hiye, hutapa nehae. ²⁹Ani kava'mo hutapa lapa pai'nova gemo afole aisigetapae'mo ani afina'mo alagi hogo hiye, hutapa hiyo. ³⁰Lama gemo lapa nepauve, huno, hemeni afina'mo mai'naya vayapati'mo ofali'nisageno muki lapa nepauva kava'mo afole aigiye. ³¹Koku'na'e ma mopa'e'mo hano hugiya'monanafa ge'nimo alagi hano osuno afa'a hanege hanege huno hanegaiye.

Hainu afina'mo afole aisifi huno hu'niya gemae

(Mt 24:36-44)

³²Na afinapi na kanalepi hu'a muki vaya'mogimo o'afi'nae. Koku'napi enisole vaya'mogi'e Mafa'ne'amo'e'mo o'afi'naya'monanafa Afo'amo'e'mo

afi'niye. ³³Hainu afina'mofi hutapa o'afi'naya'mofe'mo ehetapiye, hu'na, alagepa hutapa yagaitapa mai'netapa nunumu hutapa maiyo. ³⁴Ina kavakana huno hane'niyanagi afixo. Mago no aepa vekamo ataleno afixi kotega ugefe huno'ae'mo ali'ya'ale'mo mai'naya vaya'aife'mo hapa paino'ae'mo, ina ya'nile'e ma ya'nile'e'mo yagaitapa nateyo, huno hapa paiteno alino fako huno apaote apaote huno yagaino apate'niye. Agaemo kipa'ale'mo ne'yagaiya vekae'mo alagepa huka kava yagaika maiyo, huno ha pai'niye. ³⁵Ani kava'mo hutapa alagepa hutapa yagaitapa maiyo. Lapakaemo no aepa vekamo hainu afina'mo egaifi une'mo esifi felugakuku'mo esifi kokole age ne'aiya agufa afina'mo esifi kotilamisiyapi'mo esifi hutapa o'afi'naya'mofe'mae. ³⁶Alagepa hutapa kava yagaitapa maiyo, fiku yanageno malage huno eno lapakesiyana lapau kaletapa mai'nisageno lapakegaiye. ³⁷Lapa nepauva agufa gege'mo hu'na muki vaya'aife'mo alagepa hutapa yagaitapa maiyo, hu'na hapa nepauve, huno hapa pai'niye.

14 ¹Lole afina'mo utesigeno'ae'mo Yu vaya'ai Pasova hopa afina'mo peleti mayamo aeno apafu noleya peleti mayamo ne'naya afina'mo afole aigefe hu'niye. Mono hu'a ne'apataya vaya'aite'mo yagai'a ne'apataya vaya'e ke'aepa gemo avo'mo kae'a ali'a apaya ne'malaya vaya'mogile'mo kesi kateti'mo u'a Yesu'mo atafau'a kamiti amagisaya kafe'mo kahauya hu'a mai'nae. ²Mai'ne'apae'mo, fiku yanage'a ne'atafausunage'apae'mo hopa afina'moge'a avavu ali'a lamagigayanagi o'atafaigetao, hu'a hu'nae.

Mago a kanomo'a Yesu agufale'mo uvelimo faleno ate'niya gemae
(Mt 26:6-13; Yo 12:1-8)

³Yesu'a Metani taonifi'mo Saimoni'a lepalosi ya'mo hauno hage'niya vekamo nopi'mo mai'niye. Ne'ya'mo ne'negen'o'ae'mo mago a kanomo'a alagepa atumo ne'aiya uvelimo lusi monileti'mo miya nefaiya uvelimo yafa kepi uvelimo alinineno ani uveli ke'mo aino atagi male'neni agenopafi'mo aeno lakino faleno ate'niye. ⁴Mago vaya'mo anifi mai'naya vaya'mogimo agete'a apaipa le'a atete'a apakai'apimo, na kava higeno'ae'mo alagepa atumo ne'aiya uvelimo alinineno fiku lakino faleno ate'niye. ⁵Ani uvelimo maketi hu'nonesinana tali hataleti kinamo aliteta kagemi ya'apimo ohane'nisiya vaya'aina aliniteta apamunesine, hu'a hute'a ge hau'nae. ⁶Yesu'a, na kava higetapae'mo kanamo alitapa ne'amiye. Nagaetegamo lusi alagepa kava'mo huno ne'nate. Afa'a ataleyo. ⁷Kagemi ya'apimo ohane'niya vaya'mo muki afina'mo lapakae'e'mo lokae'a ne'maiya'mofe'mo lapausiya afina'mo apakaemo alagepa hutapa hapa maegaya'monanafa nagaemo muki afina'mo lapakae'e'mo lokae'na o'maiguve. ⁸Afa'a hu'niyesina agufa kava'mo ago huno nate'niye. Hogoteno nagufamo alino alo huno nate'niyanage'na falisuge'apae'mo

kanolufi'mo ki'a nategae. Kanolufi'mo ki'a natesayafe'mo alagepa atumo ne'aiya uvelileti'mo faleno nate'niye. ⁹Alagi lama gemo lapa nepauve, huno, vaya'mogimo nava gemo mani alagepa faigoko ge'nimo alini'u'a muki haopalegamo ae'a hakalo hu'a hapa paisage'a afisaya vaya'mogimo mani a kanomo'a hu'niya kavafe'mo apakesamo afisayafe'mo ava gemo hu'a hapa paigae, huno hapa pai'niye.

Yutasi'a kutulu ya'mo aliguve, huno hu'niya gemae
(Mt 26:14-16; Lu 22:3-6)

¹⁰Hapa paitegeno'ae'mo Yutasi'a ge'amo ne'afiya vekamo tuolofu'a vayapati vekamo apataleno mono hu'a ne'apataya vaya'aite'mo yagai'a ne'apataya vaya'aitegamo Yesu'mo avaleno apamisiyafe'mo u'niye. ¹¹Uno hapa paino'ae'mo, avaleli'ne'na lapamiguve, huno hapa pai'nige'apae'mo apamogaga aite'a, mago kutulu monimo hagea kamigune, hu'a hu'nageno'ae'mo avalelinuno apamisiya kafe'mo aepa faino kahauya huno mai'niye.

Pasova ne'ya'mo ne'naya kavafe'mo ava gemo hu'niya gemae
(Mt 26:17-25; Lu 22:7-14; 22:21-23; Yo 13:21-30)

¹²Yu vaya'mogi aeno apafu noleya peleti mayamo ne'naya hopa afinapati'mo hogote hopa afina'mo aikeli sipisipimo apamagi'a Pasova ne'ya'mo ne'naya afina'mo afole ai'niye. Afole ai'nige'apae'mo Yesu ge'amo ne'afiya vaya'mogi hu'apae'mo, Pasova ne'ya'mo nesunafe'mo haiya'alegamo uta alo hisune, hu'a afi ge'nae, ^{13,14}Yesu'a lole vekala'anife'mo, alope taonifi'mo uta haitana ani ke'ina alinino ne'esiya veka'e'mo fotu hutetanae'mo akame hutana vi'ao. Haisiya nopi vekae'mo, Tisa vekamo'a huno'ae'mo, nage'e ge'nimo ne'afiya vaya'e'mo Pasova ne'ya'mo nesuna no'mo haiyate'mo hane'niye, huno hu'niye, hutana ge hutana afi ge'ao. ¹⁵Agaemo lana valelinuno haino anaga agotofule nopi'mo aeno anagi malefa no'mo alo hu male'niyanageno alino lana veligiye. Ani nopi'mo Pasova ne'ya'mo alo hi'ao, huno hana paiteno alino anate'nige'ana u'na'ae. ¹⁶Ge'amo ne'afi'a vekala'mo taonifi'mo u'ana Yesu'a hana pai'niya kava'mo hu'ana agete'ana Pasova ne'ya'mo alo hu'na'ae. ¹⁷Yegemo lamino fale'nige'apae'mo Yesu'e tuolofu'a vaya'mo ge'amo ne'afiya vaya'e'mo e'a nopi'mo hai'a mai'nae. ¹⁸Hi'yalamute'mo mai'ne'a ne'ya'mo ne'ne'apae'mo Yesu'a, alagi lama gemo lapa nepauve, huno, lapakaepati'mo mago vekamo nage'e'mo magokepi mai'nenno ne'ya'mo ne'neya vekamo'a kame vaya'aina navaleno apamigiye, huno hapa pai'niye. ¹⁹Hapa pai'nige'apae'mo ge'amo ne'afiya vaya'ai apaipamo'mo lusi kava huno kana hu'nige'apae'mo apamete apamete hu'a, nagaefe'mo nehapiye, hu'a afi ge'nageno'ae'mo, ²⁰Lapakaepati vekamo'a nage'e'mo magokepi lokaeno mai'nenno peleti mayamo aliteno yuvapafi anipi'mo alino aeteno ne'niya vekamae, huno

hu'niye. ²¹ Huteno, Vemo mafa'nemo'mo Goti mukufi'mo avo'mo kae male'naya kate'mo afa'a ugiya'monanafa kutulu ya'mo ali'niya vekalegamo lusi aiye aiye avovo kava'mo afole aigiye. Ita'amo'mo alino o'ate'niyesinana agaetefe'mo kanale hu'niyesine, huno hapa pai'niye.

Ala kava ne'mo kave'mo ne'naya gemae
(Mt 26:26-30; Lu 22:15-20; 1Ko 11:23-25)

²² Ne'ya'mo ne'ne'apae'mo Yesu'a peleti mayamo ali'nenno Gotife'mo hao ke heteno alino akaya heno ge'amo ne'afiya vaya'aina apamitenoe'mo, manimona nagufa'nimogi alitapa neyo, huno hu'niye. ²³ Huno huteno kapumo ali'nenno Gotife'mo hao ke heteno apami'nige'a muki'amogimo ani kapufati'mo ne'nae. ²⁴ Agaemo huno'ae'mo, mani kapufi ani'mo kola'nimae. Goti'a ma kava'mo huguve, huno hu male'niya saufa kotalake gemo afole aisiyafe'mo muki asole vaya'aitefe'mo ai'na lakiguve. ²⁵ Alagi lama gemo lapa nepauve, huno, halate nofi alagafati ani'mo o'ne'na maime maime ne'visugeno'ae'mo Goti'a yagaino ne'apateya koteti'mo saufa ani'mo lapakaegi'e'mo magokepi negaune, huno hapa pai'niye. ²⁶ Apakaemo mono yokemo hute'a kumatega u'a lamite'a Alifi'aepa avefi'mo hai'nae.

Yesu'a Pitafe'mo, o'age'nova vekae, huka hugane, huno ha pai'niya gemae
(Mt 26:31-35; Lu 22:31-34; Yo 13:36-38)

²⁷ Yesu'a, Hemeni hani'ilagamo nagaete'mo afole aisiya kavatefe'mo muki'amogitapa ago asagautapa aigae. Goti Mukufi'mo avo'mo kae male'niya gemo'mo ani kavafe'mo huno'ae'mo,

Nagaemo sipisipile'mo yagaino ne'apateya vekamo
ne'amagisuge'apae'mo sipisipi anaga'amo atagu fae'a apaune he'a
u e'a hugae,

huno hu'niye. ²⁸ Hu'niya'monanafa kanolufati'mo halate ago alino he tino natesige'nae'mo Galeliya kotegamo u'na hogo netesugetapa ugae, huno hapa pai'niye. ²⁹ Pita'a, muki vaya'amo ago katale'a ugaya'monanafa nagaemo alagi katale'na o'uguve, huno ha pai'nigeno'ae'mo, ³⁰ alagi lama gemo kaha nepauve, huno, ani hani'ilagamo kokolemo'mo lole afina'mo age o'ai'nisigekae'mo nagaefe'mo lole'e mago'e afina'mo hukae'mo, o'age'nova vekae, huka hugane, huno ha pai'nigeno'ae'mo ³¹ Pita'a mago'e huno lokiya gefati'mo huno'ae'mo, kagae'e'mo magokepi faligu'anage'na alagi o'age'nova vekae, hu'na osuguve, huno hu'nige'apae'mo ge'amo ne'afiya vaya'mo muki'amogimo ani agufa gege'mo hu'nae.

Getesemani hoyafi'mo uno nunumu hu'niya gemae
(Mt 26:36-46; Lu 22:39-46)

³² Apakaemo mago mopamo agi'amo Getesemanimo ute'apae'mo Yesu'a ge'amo ne'afiya vaya'aife'mo, manile mai'nige'nao nagaemo

u'na mugalega nunumu hino, huno hapa paiteno apataleno ³³Pita'agi Yemisi'agi Yoni'agi huno apavalelino u'niye. Agaemo aepa faino lusi kava huno hau aitenoa'ae'mo amo'ya ai'nigeno ³⁴hapa painoa'ae'mo, hosu kava'mo'a faino ku aino yagaino nate'nigeno naipamo'mo lusi kava huno kana hu'nige'na falisuva naipamo nekaliye. Manile'mo mai'netapa kava yagaitapa maiyo, huno hapa pai'niye. ³⁵Apatalenuno aise afagi'ale'mo mopafi'mo asagauno aino ago'ya fai'nenoa'ae'mo hosu afina'mo faino kasalo paesiyafe'mo nunumu hu'niye. ³⁶Nunumu huno'ae'mo, Afo'nimogae, huno, kagaemo muki kava'amo huguve huka hisana kava'mo afa'a hugane. Mani kapumo nagaetegati'mo alinikuka atalo. Ani gemo huva'monanafa nagaemo nahau'niya kava'mo osuka kagaemo kahau'nisiya kava'mo afa'a huvo, huno nunumu hu'niye. ³⁷Nunumu huteno aino atagi neno eno apakeyana lole'e mago'e vaya'mo ge'amo ne'afiya vaya'mo apau kale'a mai'nageno apaketenoa'ae'mo Pitafe'mo, Saimoniyo, huno, kau kale'napiye. Magoke aovamo afa'a yagaika o'mai'napiye, huno afi ge'niye. ³⁸Apakaefe'mo, lapamalageka hisiya kavapi'mo haitapa ofalesayafe'mo yagaitapa mai'netapa nunumu hiyo. Lapaunelapame'mo'a huno'ae'mo, afa'a hugune, huno nehia'monanafa amega lapakufamo'a hisayafe'mo lokiya no'vaiye, huno hapa pai'niye. ³⁹Halate apatalenuno hogoteno hu'niya agufa gemo huno nunumu hu'niye. ⁴⁰Huteno aino atagi neno eno apakeyana apau mai mai hu'nige'a apau kale'a mai'nageno apake'nige'apae'mo, haiya agufa gemo husupi, hu'a apakesamo o'afi'nae.

⁴¹Lole'e mago'e afina'mo halate aino atagi neno uno hapa painoa'ae'mo, maitapa falu hutapage'mo lapau kaletapa mai'nafiye. Hai'mae. Ani afina'mo ago afole aiyanagi ageyo, huno, apakaemo Vemo Mafa'nemo avaleli'u'a hosu vaya'ai apayapi'mo atesayafe'mo ne'ae. ⁴²He tita vigetao. Ageyo, huno, nagae kutulu ya'mo ali'niya vekamo ago ne'e, huno hapa pai'niye.

Yesu'mo atafau'a ayatalate'mo nofi ki'a ate'naya gemae
(Mt 26:47-56; Lu 22:47-53; Yo 18:3-12)

⁴³Yesu'a ani gemo nehigenoa'ae'mo Yutasi'mo tuolofu'a vayapati vekamo ge'amo ne'afiya veka'e asole vaya'e'mo naipe alige kayo'mo alige huli'a e'nae. Mono hu'a ne'apataya vaya'aite'mo yagai'a ne'apataya vayanagi ke'aepa gemo avo'mo kae'a ali'a apaya ne'malaya vayanagi vayatama vayanagi hu'a ali'a apate'nage'a e'nae. ⁴⁴Kutulu ya'mo ali'niya vekamo'a hogotenuno alagena kava'mo hisiyafe'mo, u'na hae'na nesuva veka'ina ani vekamogi utapa atafauta avalelitapa viyo, huno hapa pai'niye.

⁴⁵Yutasi'a uno ava'yi huteno'ae'mo Yesufe'mo uno, Tisao, huno huteno haeno ne'niye. ⁴⁶Haeno ne'nige'apae'mo u'a Yesu'mo atafau'nae.

⁴⁷Ne'atafageno'ae'mo agae'e'mo he tino mai'niya vekamo'a naipemo asagino hogote vekamo mono hu'a ne'apataya vaya'aite'mo yagaino ne'apateya vekamo ali'ya'amo ne'aliya vekamo agesamo heno lafe huno atale'niye. ⁴⁸Yesu'a, vaya'mo apamagite'a kumaya'mo ne'aliya vaya'aina kalavusi hu'a apatesayafe'mo naife alige kayo'mo alige huli'a ne'aya kava hutapa alinitapa nagaetegamo ne'afiye. ⁴⁹Nagaemo muki afina'ae afina'ae'mo lapakae'e'mo magokepi mai'ne'na alopa mono nopi'mo ali'na apaya male'na mai'nova afina'mo o'natafau'nae. O'natafau'naya'monanafa Goti Mukufi'mo avo'mo kae male'naya gemo alagi afole aisiyafe'mo hu'niye.

⁵⁰Ani gemo hutege'apae'mo muki ge'amo ne'afiya vaya'mo atale'a apaune he'nae. ^{51,52}Mago neya vekamo'a yaveyave lavolavo'age'mo vaili'niya vekamo'a Yesu'mo akame huno ne'vige'apae'mo neya vaya'mogimo atafau'a lavolavo'age'mo asagi'a alitagemo agufa'alaga'ageke'mo ataleno aune heno u'niye.

Kanisole vaya'mogimo agoti hu'a ate'naya gemae
(Mt 26:57-68; Lu 22:54-55; 22:63-71; Yo 18:13-14; 18:19-24)

⁵³Apakaemo Yesu'mo avaleli'u'a hogote vekamo mono hu'a ne'apataya vaya'aite'mo yagaino ne'apateya vekamo nopi'mo hai'nae. Muki vaya'amo mono hu'a ne'apataya vaya'aite'mo yagai'a ne'apataya vayanagi vayatama vayanagi ke'aepa gemo avo'mo kae'a ali'a apaya ne'malaya vayanagi hu'a mai'nae. ⁵⁴Pita'a apamasa hulinuno hogote vekamo mono hu'a ne'apataya vaya'aite'mo yagaino ne'apateya vekamo no kumate'mo haino kava ne'yagaiya ati vaya'e'mo atale'mo loto hu'a mai'nae. ⁵⁵Mono hu'a ne'apataya vaya'aite'mo yagai'a ne'apataya vaya'e kanisole vaya'mogi'e'mo Yesu'mo amagisageno falisiya gemo afisayafe'mo kahauya hu'nayana o'afi'nae. ⁵⁶Asole vaya'mogimo aigofe faigoko gemo hu'naya'mofe'mo magoke agufa gemo osu'nafa alu ge alu gemo hu'nage'apae'mo amagisageno falisiya gemo alagi o'afi'nae. ⁵⁷Hu'nage'apae'mo mago vaya'amogi he ti'a Yesufe'mo aigofe gemo hu'nae. ⁵⁸Apakaemo hu'apae'mo, afi'nonageno alopa mono no'mo vaya'mogi apayateti'mo ki male'naya nofe'mo he'na halagape vaite'na lole'e mago'e afina'mo utesige'na vaya'mogi okisaya agufa kava hu'na kiguve, huno hu'nigeta afi'none, hu'a hu'naya'monanafa ⁵⁹apakaemo alu ge alu gemo hu'nae. ⁶⁰Hutageno'ae'mo hogote vekamo mono hu'a ne'apataya vaya'aite'mo yagaino ne'apateya vekamo'a ani vaya'ai apaulagale'mo he tino Yesufe'mo huno'ae'mo, magoke gemo aeka atagaina huka osugapiye. Haiya agufa faigoko gemo kagaetegamo nehae, huno afi ge'nigeno'ae'mo ⁶¹ge'ale'mo aeno atagaina huno ha opaino afa'a mai'niye. Mono hu'a ne'apataya vaya'aite'mo yagaino ne'apateya vekamo'a halate loka huno'ae'mo, Kalaisigamo hao ke nehaya vekamo

mafa'ne'amo mai'napiye, huno afi ge'nigeno'ae'mo ⁶²he, mai'nove, huno ha paiteno, lapakaemo agegayana vemo mafa'nemo'a ayamufa'age vekamo lamaga haopale'mo fai mai'neno he tino hiyapi'mo eminesigetapa agegae, huno ha pai'niye. ⁶³Hu'nigeno mono hu'a ne'apataya vaya'aite'mo yagaino ne'apateya vekamo'a ani gemo afiten'o'ae'mo agai'a agufaleti'mo yatala kukena'amo alino apake aino ataleteno, mago'e vaya'mogi e'a faigoko ge'amo hu'a laha paisageta afisuna gemo ohanegaiye.

⁶⁴Gotife'mo huno faipa huno ate'niya gemo ago afi'nagi na agufa kavafe'mo lapakesamo afiye, huno apafi ge'nige'apae'mo muki vaya'mogi hu'apae'mo, hosu gemo hu'niyanageno afa'a faligiye, hu'a hu'nae.

⁶⁵Mago vaya'amogi aepa fai'a apavenatu'na he'a atege augosafi'mo lavolavoleti'mo hayae'a ate'ne'a siki kayo'mo amagite'apae'mo, ina la'mo kamagi'nifigi kaune gemo huka laha paiyo, hu'a huge huge hu'a mai'nae. Ati vaya'mogimo lusi kava hu'a amagi'nae.

Pita'a Yesufe'mo o'age'nova vekae, huno hu'niya gemae

(Mt 26:69-75; Lu 22:56-62; Yo 18:15-18,25-27)

⁶⁶Pita'a kuma afelaga mai'nigeno'ae'mo hogote vekamo mono hu'a ne'apataya vaya'aite'mo yagaino ne'apateya vekamo kayokayo a'mafa'nemo e'niye. ⁶⁷Eno ageyana Pita'a atale'mo loto huno mai'nigeno aulu haeno ageno alagepa huno age'nen'o'ae'mo, kagaemo Nasalasa taonifi vekamo Yesu'e'mo mai'na'ae, huno ha pai'nigeno'ae'mo ⁶⁸ha'ao, huno huteno'ae'mo, nehana gemo no'afugi na agufa kavafe'mo ani gemo nehapi hu'na o'afuve, huno huteno no folagapi'mo u'e'a nehaya kate'mo uno mai'nigeno kokolemo'mo age ai'niye. ⁶⁹Kayokayo a'mafa'nemo'a ageteno halate anile mai'naya vaya'aife'mo, apakaepati vekamo mai'niye, huno hapa pai'nigeno ⁷⁰Pita'a halate mago'e gemo huno'ae'mo, o'age'nove, huno hu'niye. Aise afina'mo utege'apae'mo anile'mo he ti'a mai'naya vaya'mogimo Pitafe'mo, lama gemo hune, hu'a, alu kagemo ne'ainageta afi'nona'mofe'mo Galeliya kotega vekamo mai'nane. Galeliya kotega vekamo mai'nana'mofe'mo apakaepati vekamo mai'nane, hu'a hu'nageno ⁷¹Pita'a, lama gemo nosisuvana Goti'a afa'a namagigiye. Anagati'mo alagi lama gemo nehuvana o'age'nova vekae, huno hapa pai'niye. ⁷²Hapa nepaigeno'ae'mo kokolemo'mo lole afina'mo age ai'nigeno'ae'mo Yesu'a Pitafe'mo hogoteno ha paino'ae'mo kokolemo'mo lole afina'mo age o'ai'nisigekae'mo nagaefe'mo lole'e mago'e afina'mo o'age'nova vekae, huka hugane, huno ha pai'niya gee'mo agesamo afino ho huteno avilya'mo hu'niye.

Yesu'mo Pailatitegamo avaleli'a u'naya gemae

(Mt 27:1-2; 27:11-14; Lu 23:1-5; Yo 18:28-38)

15 ¹Kotilamiyapi'mo malage hu'a mono hu'a ne'apataya vaya'aite'mo yagai'a ne'apataya vayanagi vayatama vayanagi ke'aepa gemo avo'mo

kae'a ali'a apaya ne'malaya vayanagi mago'e kanisole vayanagi hu'a ge huge afige hu'nae. Hute'apae'mo Yesu'a ayatalate'mo nofi ki'a atete'a avaleli'u'a gamani vekamo agi'amo Pailati ayapi'mo ami'nae. ²Pailati'a, Yu vaya'aite'mo yagaika ne'apatana kini vekamo mai'napiye, huno afi ge'nigeno'ae'mo, he, ago lagi gemo nehane, huno ha pai'niye. ³Mono hu'a ne'apataya vaya'aite'mo yagai'a ne'apataya vaya'mogi, ina hosu kava'mo hu'niye ma hosu kava'mo hu'niye, hu'a hute'a hu'a faipa hu'a ate'nae. ⁴Pailati'a halate loka huno'ae'mo, ani gele'mo aeka atagaina huka mago gemo afa'a osugapiye. Muki kava'ae'mo kagaefe'mo nehaya gemo afiyo, huno ha pai'nigeno ⁵Yesu'a halate mago'e huno ge osuno mai'nigeno'ae'mo Pailati'a hau ai'niye.

Malamasife'mo ava gemo hu'niya gemae
(Mt 27:15-26; Lu 23:13-25; Yo 18:39–19:16)

⁶Pailati'a Yu vaya'ai Pasova hopa afina'mo kalavusi hu'a ne'apataya vayapati'mo muki vaya'mogimo kafuga'ae kafuga'ae'mo magoke vekamo lekana pai'a ate'naya vekamo ategenote ute hu'niye. ⁷Ani afina'mo mago vekamo agi'amo Malamasi'a kalavusi hu'a ate'naya vekamo mai'niye. Malamasi'e mago vaya'mogi'e'mo gamani vaya'aina kamiti apamagite'a ali'a hapa fai'a apatalesayafe'mo hu'nage'apae'mo kalavusi hu'a apate'nae. ⁸Asole vaya'mo ali'a anupa hu'a mai'ne'a Pailatife'mo, muki kafuga'ae kafuga'ae'mo nehana agufa kavake'mo huka lato, hu'a ha pai'nageno'ae'mo ^{9,10}Lapakaete'mo yagaino nelapateya kini netapimo hatu maetapa atesayafe'mo nehafiye, huno apafi ge'niye. Agaefe'mo mono hu'a ne'apataya vaya'aite'mo yagai'a ne'apataya vaya'mogi apaipa kafamo hae'naya'mofe'mo avaleli'e'a nayapi'mo nami'nae, huno agesamo afi'niye. Afi'niya'mofe'mo Yesufe'mo ge huno apafi ge'niya'monanafa ¹¹mono hu'a ne'apataya vaya'aite'mo yagai'a ne'apataya vaya'mogi muki vaya'ai apaipafi'mo hu'a fugali nehu'apae'mo, Pailatife'mo hutapae'mo, Malamasike'mo ato, hutapa ha paiyo, hu'a hapa pai'nae. ¹²Pailati'a halate asole vaya'aife'mo, Malamasi'mo hatu mae'na atesuvana Yu vaya'aite'mo yagaino ne'apateya kini nene hutapa agi ne'aya vekalegamo na kava'mo hisuve, huno apafi ge'niye. ¹³Apafi ge'nige'apae'mo alopa gefati'mo halate hu'apae'mo, malipu yosale'mo nili aiteka alika he tika ato, hu'a hu'nageno ¹⁴na agufa hosu kava'mo hu'nigetapae'mo malipu yosale'mo nili aigefe nehae, huno apafi ge'nige'apae'mo, malipu yosale'mo nili aiyo, nili aiyo, hu'a hu'nae. ¹⁵Pailati'a asole vaya'mogimo amuse hu'a atesayafe'mo apakaetefe'mo Malamasi'mo hatu maeno ate'nigeno u'niye. Hatu maeno ateteno ati vaya'aife'mo, Yesu'mo nofi kayoteti'mo amagiyo, huno hapa paiteno ati vaya'ai apayapi'mo malipu yosale'mo nili aite'a ali'a he ti'a atesayafe'mo avaleno apami'niye.

Ati vaya'mogi Yesufe'mo kigi yokalo gemo hu'a ate'naya gemae
(Mt 27:27-31; Yo 19:2-3)

¹⁶Ati vaya'mogimo avaleli'u'a gamani vaya'aite'mo yagaino ne'apateya vekamo nopi'mo hai'a ate'ne'apae'mo muki ati vaya'aife'mo ge hu'nage'a

e'a ali'a anupa hu'a mai'nae. ¹⁷Apakaemo haesa yatala kukenamo yagai'a ne'apataya kini vaya'mogi ne'vaiya agufa kukenamo aigofe kukenamo ali'a vai'a ate'ne'a aufe nofi'mo ali'a aigofe kakolitamo yagai'a ne'apataya kini vaya'mogi ne'malaya agufa kakolitamo alo hute'a agenopale'mo male'a ate'nae. ¹⁸Male'a ate'ne'a he ti'a aepa fai'a hu'apae'mo, Yu vaya'aite'mo ala'apimo yagaika ne'apatana kini ne'apimogae alagepa huka maiyo, hu'a aigofe gemo hute'a hu'a amuse hu'a ate'a mai'nae. ¹⁹Agenopale'mo kayoteti'mo amagige apavenatu'na he'a atege hute'a apale'ya fai'ne'a aigofe mono hu'nae. ²⁰Hu'a ami malete'a kigi yokalo gemo hu'a ate'a hano hute'apae'mo haesa kukenamo asagi'a malete'a agai'a kukena'amo ali'a vai'a ate'nae. Vai'a atete'a malipu yosale'mo nili aite'a ali'a he ti'a atesayafe'mo avaleli'a u'nae.

Yesu'mo malipu yosale'mo nili ai'naya gemae

(Mt 27:32-44; Lu 23:26-43; Yo 19:17-27)

²¹Kate'mo ne'vageno'ae'mo Saimoni'a Sailini kotega vekamo Alekasana'e Lufasi'e'mo afo'animo'mo ko'amo ataleno ne'ege'a fotu hu'nae. Ati vaya'mogi, alika kofilika uvo, hu'a hute'a ali'a kofi'a ate'nageno malipu yosamo kofilino u'niye. ²²U'a Gogatagayagae hu'a agi ne'aya agimo aepa'amo anu ayamufagayagamo u'a ava'yi hu'nae. ²³U'a ava'yi hute'a nofi alagafati anipi'mo atu neheya malasini'mo agi'amo meyamo ali'a lakite'a ami'nayana alino o'ne'niye. ²⁴Apakaemo malipu yosale'mo nili aite'a ali'a he ti'a ate'nae. Kukena'amo alisayafe'mo yafateti'mo yokalo lete'a ali'a fako hu'a ali'nae. ²⁵Yegemo leno hakale hu'nige'apae'mo ali'a he ti'a ate'nae. ²⁶Pailati'a mago avo'mo ina kava'mo hu'nigetae'mo amagi'none, hu'a nekaya agufa avo'mo kae'niye. Ani gemo avo'mo kaeno'ae'mo,

YU VAYA'AITE'MO ALA NE'APIMO YAGAINO NE'APATEYA KINI NENE huno avo'mo kaeteno agenopale atulu yosale'mo male'niye. ²⁷Lole vekala'moganimo vaya'mo apamagite'ana kumaya'mo ne'ali'a vekala'mo agae'e'mo malipu yosale'mo nili aite'a mago vekamo ali'a lamaga haopale'mo he ti'a atete'a mago vekamo ali'a hoga haopale'mo he ti'a ate'nae. ²⁸Ani kavafe'mo Goti mukufi'mo avo'mo kae male'niya gemo afole ai'niye. Ani gemo'a huno'ae'mo, *Agae'e ke'aepa gemo amagi'a ne'atalaya vaya'e'mo magoke agufa vaya'mo mai'nae*, hu'a apakesamo afi'nae, huno hu'niye. ^{29,30}Kate'mo u e'a hu'naya vaya'mogimo agete'a keka hute'apae'mo, he, hu'a, alop mono no'mo he'na halagape vaite'na lole'e mago'e afina'mo halate ki'na hano huguve, huka hu'nana vekamogi kagaika kagufamo alika katika kahau vaiyo, hu'a hute'a hu'a faipa hu'a ate'nae. ³¹Ani ge hu'a mono hu'a ne'apataya vaya'aite'mo yagai'a ne'apataya vaya'e ke'aepa gemo avo'mo kae'a ali'a apaya ne'malaya vaya'mogi'e'mo apakai'apimo hu'apae'mo, alu vaya'aina afa'a

hapa mae'niyanageno agai'amo afa'a hau o'vaigiye. ³² Kalaisi ne'mo Isaleli vaya'aite'mo yagaino ne'apateya kini vekamogeno aino akaino eminesigeta agetetae'mo lama gemo nehiye, huta hugune, hu'a hute'a hu'a faipa hu'a ate'nae. Ani agufa gemo hu'ana lole vekala'mo agae'e'mo magokepi nili aite'a ali'a he ti'a anate'naya vekala'mogani'e'mo hu'ana faipa hu'ana ate'nae.

Yesu'mo ago fali'niya gemae

(Mt 27:45-56; Lu 23:44-49; Yo 19:28-30)

³³ Felugakuku'mo muki haopalagamo lole'e mago'e aovamo hani huteno une'mo yegemo le'niye. ³⁴ Une afafamo Yesu'a alopa gefati'mo keya aeno ge huno'ae'mo, Eloi, Eloi lama samakatani, huno hu'niye. Ani gemo aepa'amo *Goti'nimo, Goti'nimo, huno, na kava higeke nataleka u'nane, huno hu'niye.* ³⁵ Hu'nige'apae'mo mago vaya'mo haopale'mo he ti'a mai'naya vaya'mogimo ani gemo afite'apae'mo, Afiyo, hu'a, Ilaiafe'mo ge nehiye, hu'a hute'a ³⁶ mago vekamo nagu nagu hununo kaki'nofagana ya'mo alino nofi alagafati anipi'mo aeteno yatala kanipa kayote'mo faino lanu paiteno nesiyafe'mo ami'niye. Amiteno'ae'mo, afa'a ageta maigetao Ilaia'a emineno malipu yosaleti'mo aino akaino atesifigeta agegaune, huno hu'niye. ³⁷ Yesu'a alopa gefati'mo keya aeteno fali'niye.

³⁸ Fali'nigeno'ae'mo alopa mono nopi'mo alapa'age lavolavoleti'mo ae'a akani male'naya lavolavomo anagati'mo aeno apake ailino lamino afelaga lole hu'niye. ³⁹ Ati vaya'aite'mo yagaino ne'apateya vekamo'mo aulagale'mo he tino mai'nenno afi'nigeno alopa gefati'mo keya aeno ge huteno fali'nigeno ageteno'ae'mo, alagi lama gemo nehuve. Ani vekamo Goti mafa'ne'amo mai'niye, huno hu'niye. ⁴⁰ Mago a'ne anaga'mo aise afagi'ale'mo he ti'a mai'ne'a aulu he'a age'a mai'nae. Ani a'nefi'mo Maliya'a Maganala kotega anagi Maliya'a henaga Yemisi'e Yosesi'e'mo ita'animo'agi Salome'agi hu'a mai'nae. ⁴¹ Yesu'a hogoteno Galeliya kotegamo umenitata nehige'apae'mo ani a'ne anaga'mogimo akame hu'a u'e'a nehu'apae'mo ha mae'nae. Mago asole a'ne anaga'mo agae'e'mo Yulusalemu kotegati'mo e'naya a'ne anaga'e'mo anifi'mo mai'nae.

Yesu agufa'amo yafakapi'mo alininuno kino ate'niya gemae

(Mt 27:57-61; Lu 23:50-55; Yo 19:38-42)

^{42,43} Yegemo lamino falegefe hu'nigeno'ae'mo Yosefe'a Alamatiya kotega hogote kanisole vekamo'mo Goti'a yagaino apatesiya kava'mo afole aisiya afinafe'mo agava mai'niya vekamo e'niye. Ani afina'mo alo nehaya afina'mo hane'niya'mofe'mo egamo Sapati afina'mo afole aigiye, huno huteno Yosefe'a lokiya'amo aliteno'ae'mo koli aipamo okali'nigeno uno Pailatife'mo, Yesu kefa'amo aligesuve, huno afi ge'nigeno ⁴⁴ Pailati'a, ago malage huno fali'nifiye, huno huteno agesa

ala'amo afino hau aitenao ati vaya'aite'mo yagaino ne'apateya vekae'mo ge hu'nigeno e'nigeno'ae'mo, ago fali'nifiye, huno afi ge'nigeno'ae'mo, ⁴⁵ago fali'niye, huno ha pai'nigeno Yosefefe'mo, kanalenagi uka aliyo, huno ha pai'niye. ⁴⁶Yosefe'a yaveyave lavolavomo miya failineno male'nenao Yesu agufa'amo aino akaino alinine emineno lavolavofi'mo hayaetenao alininuno yafa kapi'mo kino atetenao alopa yafa'mo alino heleve heleve hulinuno yafa ka avayale'mo aino akani male'niye. ⁴⁷Maliya'a Maganala kotega a'e hamo'amo Maliya'mo Yosesi ita'amo'e'mo age'na'ageno kino ate'nige'ana age'na'ae.

Yesu'a halate ago he ti'niya gemae
(Mt 28:1-8; Lu 24:1-12; Yo 20:1-10)

16 ¹Sapati afina'mo utege'apae'mo Maliya'a Maganala kotega anagi hamo'amo Maliya'mo Yemisi ita'amo'agi Salome'agi hu'a alagepa atumo ne'aiya uvelileti'mo alini'u'a agufale'mo fale'a atesayafe'mo miya fai'nae. ²Hogote afina'mo kotilamiyapi'mo yegemo eno haine'nige'apae'mo ani a'ne anaga'mo kanolulegamo u'nae. ³Kategamo ne'u'apae'mo apakai'apimo, ina la'mo laha maeno yafa'mo alino heleve hu male'nisigetae, hu'a hu'nae. ⁴Alopa yafa'mo hane'niya'mofe'mae, hu'a apakesamo afili'a e'nae. E'a agayana yafa'mo avayale'mo ohane'nifa afayatagage'mo hane'nige'a age'nae. ⁵Apakaemo yafakapi'mo fale'u'a hai'a agayana neya vekamo yaveyave'age yatala lavolavomo vaili'niya vekamo lamaga haopale'mo fai mai'nige'apae'mo agete'a hapau ai'nae. ⁶Agaemo, lapau o'aiyo, lapakaemo Yesu'a Nasalasa taonifi vekamo malipu yosale'mo nili ai'nageno fali'niya vekamo agesayafe'mo ne'ae. Ageyo, huno, Mafi o'mai'nifa ago he tino u'niye. Ki'a ate'naya ya'age'mo hane'niyanagi ageyo. ⁷Hane'niya'mofe'mo utapa ge'amo ne'afiya vaya'aife'mo hapa paige Pitafe'mo ha paige hiyo. Yesu'a Galeliya kotegamo visugetapa nagegae, huno lapa pai'niyanageno uno hogonetesigetapa ani kotegamo utapa agegae, hutapa hapa paiyo, huno hapa pai'niye. ⁸Ani a'ne anaga'mo yafa kapatim'amo nelami'apae'mo atale'a apaune hetale'a ne'u'apae'mo atete hapauge lusi kava hu'a hapau aige koli huge huli'a u'naya'mofe'mo apakaemo mago vaya'aife'mo alagi ge osu'a afa'a u'nae.

Yesu'a vaya'ai apaulagale'mo alino afole ai'niya gemae
(Mt 28:9-10; Yo 20:11-18)

⁹Hogote afina'mo salefi kotilamiyapi'mo Yesu'a hogoteno afa'a mai'nenao'ae'mo Maliya'a Maganala kotega a kanomo aipafati'mo seveni'a hosu apaune vaya'mo alino hapa faino apatale'niya a kanomo aulagale'mo alino afole ai'nigeno age'niye. ¹⁰Ageteno u'niyana agae'e'mo magokepi lokae'a ne'maiya vaya'mogimo yulagefa aige avi'ya huge

hu'a mai'nageno uno hapa pai'niye. ¹¹ Hapa paino'ae'mo, Yesu'a ago he tino afa'a mai'nige'na age'nove, huno hapa pai'niyana ani gee'mo lama gemo nehiye, hu'a apakesamo o'afi'nae. ¹² Henaga'amo lole vekala'mo taonifilagati'mo ne'va'ageno'ae'mo aeto agufa agufamo aliteno lole vekala'ani anaulagale'mo alino afole ai'niye. ¹³ Afole ai'nige'ana agete'anae'mo halate ai'ana atagi ne'e'ana mago vaya'amogife'mo hapa pai'na'age'apae'mo afi'nayana ani ge'anie'mo apakesamo o'afi'nae. ¹⁴ Henaga'amo leveni'a vaya'mogi ne'ya'mo ne'nageno apaulagale'mo alino afole ai'nige'a muki'amogi agete'apae'mo age'naya vaya'mogi hapa pai'naya ge'apie'mo apakesamo o'afi'naya'mofe'mo apaipamo'mo lokiya vai'nige'a apakesa afi'a fatago osu'nageno ge hapau'niye. ¹⁵ Agaemo, muki ma mopafi vaya'aitegamo utapa alagepa faigoko ge'nimo muki vaya'aife'mo aetapa hakalo hutapa hapa paiyo. ¹⁶ Muki vaya'mogimo apakesa afi'a fatago hute'a ani'mo falesageno'ae'mo Goti'a apakufamo alino katino apategaiye. Apategaiya'monanafa muki vaya'mogimo apakesa afi'a fatago osisayana Goti'a agoti huno apateteno'ae'mo, hosu vayane, huno hugiye. ¹⁷ Apakesa afi'a fatago nehaya vaya'mogi ina agufa no'agaya aune kava'mo hugae. Apakaemo nagi'nileti'mo hosu apaune vaya'aina ali'a hapa fai'a apatalege saufa apakemo aige ¹⁸ vaya'mo nehapaeya nagalo'yavemo atafauge hugae. Ani kava'mo hu'a vaya'mo nete'a nefaliya ani'mo nesayana ofaligae. Kaita hapau'nisiya vaya'ai apakufale'mo apaya'mo male'ne'a ali'a alagepa hu'a apategae, huno hapa pai'niye. ¹⁹ Ala kava ne'mo'a ani gemo huno hapa paitegeno'ae'mo Goti'a koku'napi'mo avalelinuno haino ate'nigeno lamaga haopale'mo fai mai'niye.

²⁰ Apakaemo muki haopalegamo umenitata hu'a ae'a hakalo hu'a hapa pai'nageno'ae'mo Ala kava ne'mo'a apakae'e'mo magokepi lokaeno ali'ya'mo aliteno hapa pai'naya gele'mo alagena aune kavateti'mo alino lokiya vaino ate'niye. He, lama ge.